

Ēkwo-ozī, Pọlu Deru Nụ Ndu
Romu

¹ Ēkwo-ozī ọwa-a shi l'ẹka mụbe Pọlu; onye ejeru Jizọsu Kéreshi ozi; bụru onye Chileke kuru gẹ mu bụru onye-ishi-ozī ono; bya abụru onye Chileke họtaru gẹ mu bya ezia ozi-oma iya ono.

² Ozi-oma ono bụ iphe, Chileke shihawaa l'ọnu ndu mpfuchiru nkiya kwehawaa ukwe iya teke dūhakpowaro ẹnya ẹnya; tẹme a byakwaphọ edehawa iya l'ẹkwo-opfu Chileke. ³ Ozi-oma ono bụ kẹ Nwa iya, bụ iya bụ Nnajiuphu anyi Jizọsu Kéreshi. A -bya l'abubu, ọ bụ nemadzụ bụ l'a nwuru iya ọ bụru Nwa Dévidi. ⁴ Chileke shi l'ike ono, meru iya ọ bụru onye dū nsọ ono; mee ya o shi l'ọnwu teta dzuru ndzụ egoshi l'ọ bụ Nwa iya. ⁵ Ọ bụ iya bẹ Chileke gbẹ l'ẹka iya meeru mu eze-iphe-oma ono, bụ kẹ gẹ mu bụru onye-ishi-ozī duru ọha, shikpọo ẹkameka lẹ mgboko mgburugburu duba l'uzo, ẹphe e-shi kweta; meje iphe, e deru l'ẹkwo-opfu Chileke g'eeshi nno kutsee ẹpha Kéreshi ono. ⁶ Gẹ mu edu ndiphe l'ophu ono bẹ unubẹ ndu Romu yichakwaa ya; mbụ unubẹ ndu Chileke kuru g'unu bụru kẹ Jizọsu Kéreshi.

⁷ Ọo ya bụ lẹ mu ede ẹkwo-a anụ unu g'unu hakota lẹ Romu; mbụ unubẹ ndu Chileke yeru obu bya ekua unu; g'unu bụru ndu-nsọ. Gẹ Chileke, bụ Nna anyi yẹ Nnajiuphu ono, bụ Jizọsu Kéreshi meeru unu eze-iphe-oma; mekwaaphọ g'ẹhu dū unu guu.

Pọlu epfu k'ẹje Romu

⁸ Iphe mbụ kpọada bụ lẹ mu gbẹ Jizọsu Kéreshi l'ẹka ekeleru unu Chileke g'unu ha; kẹle e pfudzuwaru k'ekwekwe, unu kweru kẹ Chileke l'eliphe mgburugburu.

⁹ L'Ọ kwa Chileke bu onye ekebe mu l'anọduje epfuru iya opfu ẹhu unu eswe l'enyashi me mu -nọdu epfu anu iya. Ọo Chileke ono be mu gude obu mu g'ọ ha ejeru ozi k'ezi ozi-oma ke Nwa iya ono, bu Jizosu. ¹⁰ Mu anọduje epfu anu iya su g'o gude obu omaa ya mee ge mu kabẹ kpata uto bya agbaphee unu. ¹¹ L'ogokpo mu agugu ge mu l'unu huma; k'ophu mu e-me g'iphe-oma, shi Unme-du-Nso l'eka rwube unu eka. L'eshi egube ono mee g'obu shihu unu ike. ¹² Mbu le-a; iphe, mu epfu bu l'ekweta, unu kwetaru e-me g'obu shihu mu ike; ekweta nkemu emekwapho g'obu shihu unu ike. Ọo ya bu; anyi eshi nno yeru nwibe anyi eka.

¹³ Iphe, unu a-maru; unwunna mu; bu le tekenteke be mu asuje le mu abyawaa unu agbaphe; ole eshikpo teke ono bya asu nta-a be o nweerupho iphe, akposhije mu abyabya. Mu atubeje le mu a-bya ge mu aharu ndu ndu-unu pfuta yeru Kereshi ge mu epfukwa iya pho l'ohamoha ozo, abukwapho ndu Jiu. ¹⁴ Le mu jikwa onyemonye ugwo ezi ozi-oma ono. Mu ji iya ndu Gurisu bya ejiru iya ndu abudu ndu Gurisu. Mu ji iya ndu guru ekwo; bya ejiru iya ndu aguduru ekwo. ¹⁵ Noo g'o gude o nọdu agu mu egu abya ezi unube ndu no le Romu ozi-oma onokwapho.

Ike ophu Chileke gude adzo ndiphe

¹⁶ L'iphere ezi ozi-oma ke Kereshi ono ta adukwa mu. Kele o kwa iya bu ike, Chileke gude adzo iphe, bukpo ndu kwetaru ke Kereshi. O gude iya vuru uto adzo ndu Jiu; ndu ta abudu ndu Jiu nọdu etso phe. ¹⁷ L'ọ kwa ozi-oma ono be Chileke gude egoshi apfubekoto nkiya, bu iya bu ekweta nkiya, shita l'ishi jasu l'ikpetemazu; bu iya bu g'e deru iya l'ekwo-opfu Chileke su: "Onye pfuberekoto e-gude ekweta nọdu ndu."

Ikpe, nmaru ndiphe l'oplu

¹⁸ O buru iya meru g'o gude Chileke shiwaa l'imigwe goshi ge ya e-gude oke-ehu-eghu iya mee ndiphe; mbu oke-ehu-eghu, l'eghu iya nu le ndiphe kpuru iya ebo l'afu; teme ephe ndu eme ejo ememe. Epe gude ejo ememe, ephe eme akpaya okpobe-opfu ono ishi. ¹⁹ Ipe, gbaru nemadzu g'o gogo maru iya le ke Chileke be dabyiru eba l'iphu iya; ke Chileke goshiru phe iya l'onwiya. ²⁰ Eshikpo teke Chileke meru mgboko be nemadzu shiwaa l'iphe, Chileke meshiru maru egube onye o bu okpobe amaru. L'ike iya, nyiberu anyibe an ojeje; teme o buru iya gedegede bu Chileke. Oo ya bu l'ephe ta agofuedu. ²¹ Le nemadzu machacharu le Chileke du; ophu ephe akwabejedu iya ubvu l'o bu Chileke; ophu ephe ekelejedu iya ekele. O chia iphe, meru nu bu l'egomunggo sweshihwaru phe; k'ophu oriri phe buwaa iphe-mmanu; o buwaru eme eswe jiru phe obu; k'ophu obu phe gbahwaru tsukiribaa. ²² Epe gude l'ephe suru l'ephe maru iphe; kabakporo aburu ndu eswe. ²³ Epe woru ubvu, e gege akwabe Chileke ono, a-no je aduwaruro aduru ono ye l'azu bya abaaharu ntekpe eja; ntekpe, e megbaaru o du ge nemadzu, ta adudu eka oo-no-beru; ozoo g'enu, ephe l'eli; ozoo g'anu; ozoo g'agwo.

²⁴ Noo g'o gude Chileke paru phe haa; ephe melahaa ejo ememe, bu iphe, agu obu phe. Epe wata eme onwophe njo ememe. ²⁵ Nemadzu woru iphe, bu okpobe-opfu ke Chileke ye l'azu; kweta iphe, bu uka; bya awata abaru iphe, Chileke meru ememe eja; akwabe iya ubvu; haa Chileke ono, meshiru iya nu ono; bu onye o gbaru ke g'anyi tuje epha jasu le tuutuutu le mimiimii. Nokwa g'o du.

²⁶ O b̄uru iphe ono meru g'o gude Chileke par̄u nemadz̄u haa; ẹphe wata aji momomo; eme iphe d̄u ideyideyi. Kẹ g'unwanyi phẹ hajẹ ejepfu unwoke, b̄u iphe, Chileke medoru phẹ; wata ejepfu unwanyi ibe phẹ.

²⁷ Nokwapho g'unwoke phẹ har̄u ejepfu unwanyi, b̄u iphe, gbaru phẹ n̄u; ẹgu ejepfu unwoke ibe phẹ n̄odu an̄oduje enwu phẹ phuruphuru g'oku l'ẹhu. Nwoke yẹe nwoke ibe iya wata akwakwa. Ẹphe watan̄u ah̄uma urwu, gbaru ọriri, sweshihuru phẹ n̄u l'ẹhu phẹ.

²⁸ S̄u-a; eshinu ndiphe te ekwedu amaru iphe, b̄u ọkpobe-opfu lẹ kẹ Chileke; Chileke par̄u phẹ haa; ẹphe n̄odu arije ọriri, enwedu ishi; watan̄u eme iphe, agbaduru phẹ n̄u. ²⁹ Ọphu ọ d̄udu ẹgube ẹjo ememe; mẹ iphe, apf̄uduru-oto, ẹphe te emedu; k'ọphu oobushihu phẹ ebushihu l'ẹhu. Ẹphe n̄odu aji momomo g'ẹphe naa iphe, ab̄udu nkephẹ; edoberu nwibe phẹ ọkpoma mgbashi. Ẹnya pf̄urupfuru paa phẹ ẹka l'ẹhu; ẹphe n̄odu egbu ọchi; esephe opfu opfu bya agho-phe ugho; ẹphe n̄odu eme iphe-ashi; bya asu-phe asulasu. ³⁰ Ẹphe n̄odu evu nwibe phẹ nvu azu; b̄uru ndu Chileke d̄u ash̄i; ndu an̄oduje eme nwibe phẹ iphe-iphere l'obu ọku; b̄uru ndu eme nggangga bya etse etsetse. O b̄uerupho g'ẹphe e-me mee ẹjo-iphe bẹ ẹphe an̄oduje ari; tẹme ẹbe ẹphe ekwejedu eme iphe, ne phẹ lẹ nna phẹ pfuru. ³¹ Ẹphe b̄u ndu enwedu egomunggo; ọphu e gudedu ire phẹ ẹka. Ẹphe ta aph̄ujeduru nwibe phẹ obu-imemini; ẹbe ẹphe enwedu obu-oma. ³² Ẹphe b̄u ndu machacharu iphe, b̄u ikpe Chileke; maru lẹ ndu eme ẹgube ẹjo-iphe ono b̄u ọnwu, b̄u iphe, gbaru phẹ n̄u. Ọphu ọ b̄udua l'ẹphe eme nno; obenu lẹ ndu eme g'ẹphebedua agbeje d̄u phẹ ree.

2

Ikpe, Chileke nmaru onyemonye

¹ Noo g'o gude mu su ngu l'i ti g'ofukwapho gube onye ophu ekpe onye ozo ikpe; onye i buhabe. K'ele o iphe ono, iikpe onye ozo ikpe iya ono be i gudekwapho anma onwongu ikpe. K'ele gubedua, l'ekpe ikpe emekwapho iphe ono, iikpe onye ozo ikpe iya ono. ² O'le ophu anyi makaharu bu l'ikpe Chileke pfuru-oto l'ehu ndu eme egube iphe ono. ³ Gube nwodumeka; ?I dobesu le teke igbarwushije ndu eme egube iphe ono; bya emekwa iya pho l'onwongu; ?i dobesu l'ii-nahu ikpe ke Chileke? ⁴ ?T'oo; bu eze odoo ophu paru eka apaa, Chileke emeje; waa l'o bujeru nemadz'u -mee iphe-eji l'o paru iya haa; teme o nodu anoduje ata nshi shii; ?bu iphemiphe ono, be i woru nmaa phulaphula? Ophu i madu l'iphe, o gude Chileke nodu emejeru ngu odoo bu l'oome g'izimanu lwa ngu azu; g'i haa eme iphe-eji lwafuta iya. ⁵ Obenu le nta-a be i nweru ejo okpoma kwefu ike g'odoo, Chileke eme te eme g'izimanu lwa ngu azu. Oo ya bu l'iime g'iphe-ehuka nkengu ka shii mboku ikpe ono, Chileke e-goshi oke-ehu-eghu iya me g'ikpe nkiya du, bu iya bu ikpe pfuru-oto ono. ⁶ Mboku ono be Chileke e-bukwa onyemonye nggo le g'iphe, o meru gbaru. ⁷ Ndu taru nshi nodu eme iphe, du ree; kukebe ehua ach'o ge Chileke jaa phe ajaja; kwabe phe ubvu; be oo-me g'ephe nodu ndu ojejoje; ephe taa nwuhubaedu anwuhu. ⁸ Obenu le ndu ono, bu ndu kwefuru ike ono; ndu ata ngadu okpobe-opfu nchi; o chia iphe, ephe etso bu iphe, apfuduru-oto; ndu ono be Chileke a-tu-koshi oke-ehu-eghu iya, paru eka. ⁹ Iphe, bu onye emekpo ejo-iphe be ehua ta abyadu eburu ebvuru; teme o je l'e-je iphe-ehuka iya. Oo-vuru uzo dapfuta ndu Jiu; teme ndu abudu ndu Jiu etsota iya.

¹⁰ Obenu l'onnyemonye, eme iphe, du ree be Chileke a-ja ajaja; kwabe iya ubvu bya emee; ehu adu iya guu jasu le tuutuutuu le miiimii. Oo-vuru uzo meeru iya ndu Jiu; teme ndu abudu ndu Jiu etsota iya. ¹¹ Kele Chileke ta adudu onye oole enya l'iphu.

¹² Iphe, bukpo onnyemonye, amadu ekemu mee iphe-aji be Chileke a-nmakwa ikpe; ephe alaa l'iyi; obeta ebe ephe amadu ekemu. Iphe, bukwanu ndu bu ndu maru ekemu bya emeela iphe-aji be Chileke e-gudekwapho ekemu ono nmaa ikpe. ¹³ Lo to bukwa ndu anumaje ekemu be bu ndu pfuberekoto l'iphu Chileke; o chia ndu eme iphe, ekemu pfuru bu ndu Chileke a-gu le ndu pfuru-oto. ¹⁴ Le teke o bu le ndu abudu ndu Jiu, bu iya bu ndu amadu ekemu gbegudeje uche phe eme iphe, du l'ekemu; bu nu iya-a bu l'ephe egoshi l'ephe maru iphe, gbaru phe l'ememe; obeta ebe ephe amadu ekemu. ¹⁵ Umere phe egoshi l'iphe, ekemu pfuru be Chileke dewaru phe l'obu. Teme egomunggo phe nodu agbakwa phe pho ekebe; eshinu oriri phe anoduje anmaa phe ikpe bya ahajekwarupho aharu phe enge. ¹⁶ Mboku ono, Chileke e-kpe ikpe ono be oo-gbe Kereshi Jizosu l'eka kpee nemadzu ikpe iphe, nemadzu arije domia l'okpoma iya. Noo iphe, ozi-oma ono, mu anoduje ezi onoya pfuru.

Ndu Jiu ephe l'ekemu

¹⁷ A bya l'ehu gubedua, bu onye Jiu; i nodu etu onwongu onye Jiu bya akporu obu ye l'ekemu; bya egude gule Chileke aba l'abaa. ¹⁸ I maru iphe, bu uche Chileke; teme ekemu iya nodu egoshi ngu iphe, gbaru ngu l'ememe; me iphe, agbaduru ngu l'ememe. ¹⁹ I makaharu l'i bu onye edu ndu atsu ishi; bya aburu iphoro ke ndu no l'ochii. ²⁰ I buru onye akpo-ziru ndu eme eswe uzo; bya aburu onye ezi ndu bu unwegirima

iphe. I maru ekemu Chileke; bya amaru Okpobe-opfu du l'ekemu ono. ²¹ Oo ya bu; eshi ophu inoduje ezi ndu ozo; ?bu gunu kparu iphe, i tii zidu onwongu? Gube onye ara iya arara su g'e te zijeshi iphuru; ?tii zikwanu iphuru l'onwongu? ²² Gube onye epfu su g'e te erijeshi ogori; ?ti rikwanu ogori? Gube onye ono, agburu nshi, a gworo agwo gwotuphe ?ti jejekwanu ezita iphe, e doberu l'eze-ulo-nshi? ²³ Gube onye ono, aba abaa le Chileke turu ekemu doberu ngu ono; ?ti nodujekwanu emebyishi ekemu obu; gude iya eme Chileke iphe-iphere. ²⁴ L'e dekwaru l'ekwo-opfu Chileke su: "Ndu ohozo epfubyishi Chileke; o buru umere unu kparu iya."

²⁵ Urwu dukwa l'ebu ubvu bu eviya; ole oo 'ekwapho me o -buru l'i meje-a iphe, ekemu pfuru. Obenu teke o bu l'inoduje emebyi ekemu be gu l'onye ebuduru ubvu a-gbaru l'aji. ²⁶ Nokwapho g'o du onye ebuduru ubvu. Teke o bukwanu l'onye ebuduru ubvu emeje iphe, ekemu pfuru; ?ta agudu iya l'onye buru ubvu to? ²⁷ Oo ya bu le ndu abudu ndu Jiu ono, bu ndu ebuduru ubvu ono l'anma gube onye Jiu ikpe. Unubedua, bu ndu Jiu nweru ekemu, e deru l'ekwo bya ebua ubvu; teme unu gbemebiyi ekemu. ²⁸ Onye buepho onye Jiu l'enya ndiphe ta bukwa iya bu l'a bu onye Jiu. Ophu ebu ubvu ophu eebu l'anu-ehu abukwa iya pho bu l'e buru ubvu. ²⁹ Iphe, bu okpobe onye Jiu bukwa onye bu iya nu l'ime okpoma iya. Okpobe ebu ubvu; buru ophu eebu l'ime obu, bu iya bu ophu Unme Chileke buru nemadz; o to bukwa ophu e buru l'oo g'e mee ya g'e deru l'ekwo ekemu. Egube onye ono ta abukwa nemadz ajaje iya ajaja; o kwa Chileke be ajaje iya nu.

3

¹ Su-a; ?bukwanu gunu be onye Jiu gude ka onye

abudu onye Jiu mma? ?Denukwanu urwu, du l'ebu ubvu?
² O kwatakpoakwaaru baa urwu, ha shii l'uzomuzo. Ke
 mbu kpoada bu l'oo ndu Jiu be Chileke woru opfu, o
 pfuru ye l'eka. ³ Le-a; ome o bukwanu l'ephe haru buru
 ndu ekwetaduru nu teke ono; ?e gege gude l'ephe te
 ekwetaduru su le Chileke be ta agbaeduru g'e gude ire
 iya aka too? ⁴ Tuswekwa! G'e goshichikwa le Chileke
 ta adudu teke o buedupho onye ire-lanu g'o bu; o
 betakporu nemadzu mgburugburu je a-bueberu ndu
 ntuphu-ire. Noo iphe, e deru l'ekwo-opfu Chileke su:

“Oo l'opfu ngu Chileke be
 ee-shi goshi
 li bu onye pfuru oto.

Ophu o dudu teke e kuru ngu
 ikpe gi ti kpefu.”

⁵ Teke o bukwanu l'oo l'anyi ta agbaduru g'e gude ire
 anyi aka emeje g'a huma ge Chileke gbaberu k'egude ire
 iya aka; ?buhunu gunu be anyi e-pfu? ?Anyi a-su le
 Chileke meru ejo-iphe l'o kpaberu anyi oke-ehueghu
 iya? Nta be mu ajikpoakwa aji-a ge ndiphe ozo anoduje
 aji. ⁶ Tuswekwa! O -bu l'o to du nno me ?Chileke
 emehunu imagha oo-kpe ndiphe ikpe?

⁷ Le-a; teke o bu onye ntuphu-ire; o buru iya agbeje
 mee g'a kabaa amaru le Chileke bu onye ire-lanu; jaa ya
 ajaja; ?denu g'o gude Chileke jehunu a-nma mu ikpe le
 mu bu onye iphe-eji? ⁸ ?Bu gunu kparu iphe, anyi tee
 pfudu iphe ono, ndu anoduje agbaru anyi mgbamu; ebo
 anyi ibo suru l'anyi epfuje ono? Iphe ono bu: “G'anyi
 meanar o ejo-iphe g'ee-shi ge k'oma eshi iya futu.” Ndu
 ono be Chileke a-nmakwa ikpe, bu iphe, gbaru phe nu.

Ikpe, nmaru onyemonye

⁹ Nta-a-ee? Onodu anyibe ndu Jiu ?o ka ke ndu abudu ndu Jiu mma to? Tuswekwa! Anyi ta akakpoda phẹ mma ililekpoo. Iphe, anyi goshiru bu l'anyibe ndu Jiu; me ndu abudu ndu Jiu tukoru buru ndu iphe-ẹji pyitaru l'ekpiri. ¹⁰ L'e dekwaru l'ekwo opfu Chileke su:

“O to dukwa me onye

pfuberekoto;
mbukwa m'onye lanu.

¹¹ Ophu o dudu me onye lanu,
nweru egomunggo;
ophu o dukwapho onye
eseje ge ya maru Chileke.

¹² Onyemonye ghawaru Chileke
azu.

Ephe tukowaru yifu.

O to dudu onye ophu eme
iphe, pfuru-oto
g'o ka mma l'oo onye lanu.

¹³ Ekpiri phe bu ilu, gheru onu.
Ire phe be ephe egudeje
edepushi nwibe phe.

Opfu, shi phe l'onu nodu
egbu egbugbu
g'eru ejo agwo.

¹⁴ Iphe, jiru phe onu bu ephu
iphu
yee opfu, shi l'okpoma
mgbashi.

¹⁵ Ephe ekwoje gburumu je
egbua nemadzu.

¹⁶ Uzo, ephe eshi bu iphe,
adu je iya nu bu ola-l'iswi
yele aphu.

17 Ēp̄he ta amadū ụzo nchi
adu-doo.

18 Ōphu ēp̄he ta atsudū Chileke
ebvu ililekp̄oo.”*

19 Ōphu anyi makahakp̄ooru bū l'iphemiphe, e deru l'ekwo ekemu Chileke bū ndu a tu-doru ekemu ōbu bē e dedoru iya. Ōo ya bū g'̄o t̄o dū onye a-ḡofu nū. Ōnu aburu onyemonye kp̄urukudukuu; wafua g'on'yemonye e-shi egube ono buru onye-ikpe nmaru l'ip̄hu Chileke.

20 Ip̄he, o gude ō dū nno bū l'ō t̄o dūdu onye a-sū lē ya e-gude eme g'ekemu pfuru buru onye pf̄uberekoto l'ip̄hu Chileke; eshinu ip̄he, ekemu emeje bū l'o meje gē nemadzū maru lē ya mewaru ip̄he-ēji.

Ap̄f̄ubekoto ōphu shi l'ekweta

21 Obenu lē nta-a bē e goshiwaru ip̄he, bū ap̄f̄ubekoto kē Chileke, ab̄uedu ōphu shi l'edobe ekemu. Ip̄he ono buru ip̄he, ekemu mē ndu mpfuchiru Chileke gbaru ekebe iya. 22 Ap̄f̄ubekoto kē Chileke-a; shi l'ekweta anyi kwetar̄u kē Jiz̄osu Kéreshi rwube anyi ēka. Ō t̄o dūdu onye ōogufuje mē nanū; 23 kēle onyemonye mewaru ip̄he-ēji; shi nno nafū onwiya ōdu-biribiri kē Chileke.

24 Obenu lē Chileke mewaru onyemonye eze-ip̄he-ōma kē mmanū gua ya l'onye pf̄uberekoto. Ō buru onye o shi l'ēka mee ya bū Kéreshi Jiz̄osu onye meru g'ēp̄he nweru onwoph̄e. 25 Chileke goshiru Kéreshi l'edzudzu-̄oha g'̄o buru ēja, e gweru gwefu ip̄he-ēji ndip̄he. Ō buru mee, Kéreshi ono gbash̄iru teke ō nwuhuru ono bē Chileke egudeje aguru nemadzū nvū l'ip̄he-ēji iya; mbū ndu woru onwoph̄e ye iya l'ēka. Chileke shi egube ono mee gē ya goshi lē ya pf̄uberekoto. Lē teke ndiche bē Chileke shi ab̄ujeru onye meru ip̄he-ēji l'ō tāelaa nshi lephua ya

* 3:18 3:18 Ḡunaa Ebv̄u 36:1.

enya. ²⁶ Ọle nta-a bẹ oogoshije gẹ ya eshije mee ndiphe g'ẹphe bụru ndu p̄f̄uberekoto; kẹle yẹbedua bụ onye p̄f̄uberekoto bya abụkwarupho onye emeje iphe, bụ ndu kwetarū kẹ Kéreshi g'ẹphe bụru ndu p̄f̄uberekoto.

²⁷ Sụ-a; Ọ dukwaduru onye duru iphe, ọo-nọdu aba l'aba nta? Ọ tọ dọkwa. Ọ bụru ẹka o meru imagha? Ọ bụ l'anyi eme iphe, ekemu pfuru tọo? Waawakwa. Ọ buakwaa l'anyi woru onwanyi ye Kéreshi l'ẹka. ²⁸ Kẹle iphe, anyi maru bụ lẹ Chileke agụjeekwapho nemadzū l'onye p̄f̄uberekoto mẹ ọ -būru l'onye ono kwetarū kẹ Kéreshi; ọ tọ bukwa shita l'eme iphe, ekemu pfuru. ²⁹ Chileke Ọ bụ Chileke ndu Jiu kpurumu tọ? Ọ tọ buedu Chileke kẹ ndu abudu ndu Jiu? Ee! Ọ bụfua Chileke ndu abudu ndu Jiu. ³⁰ Ọ bụepho Chileke lanu du kpoloko. Ọ bụru iya a-gu ndu Jiu, kweru kẹ Kéreshi lẹ ndu p̄f̄uberekoto; bya abụkwaru iya pho a-gu ndu abudu ndu Jiu, kweru kẹ Kéreshi lẹ ndu p̄f̄uberekoto. ³¹ Ọ pfuru l'anyi gudewaa k'ekweta-a rwutoshia ekemu tọo? Tụswakwa! Iphe, anyi emechia bukwa g'ekemu nguru anguru.

4

Iphe-nggoshi, Ébirihamu meru

¹ Ọdenu iphe, anyi e-pfu lẹ kẹ Ébirihamu, bụ nnaji ndiche anyi phe? Ọdenu g'ọ nwuru ye ya? ² Lẹ teke ọ bụ l'ọo iphe-oma, Ébirihamu metaru bẹ Chileke gude gūa ya l'onye p̄f̄uberekoto; bẹ o nwekwarū iphe, o gogo gude aba l'abaa; ọle ọ tọ bukwanu l'iphu Chileke. ³ Noo iphe, e deru l'ẹkwo-opfu Chileke sụ: “Ébirihamu kwetarū kẹ Chileke; a gūaru iya ya l'ap̄f̄ubekoto.” ⁴ Sụ-a; onye jeru ozi bẹ a ta sụjekwa l'iphe, a nūru iya lẹ k'ozī ono bụ iphe-oma bẹ e meru iya; gbahaa l'ọo ugwo, rwuberu iya nū bẹ a pfuru iya. ⁵ Obenu lẹ teke nemadzū gwoberu

k'ese akanya ẹhu iya; bya ekweta kẹ Chileke ono emeje g'onye iphe-ẹji buru onye p̄f̄uberekoto ono; a ḡuaru iya ya l'ap̄f̄ubekoto. ⁶ Ọ kwaph̄o iphe, d̄u nno bẹ Dévidi t̄uberu ep̄fu teke ono, o pfuru k'ẹhu-utso nwoke ọ̄phu Chileke ḡuru l'onye p̄f̄uberekoto; l'ẹbe ab̄u l'o gude ẹka iya meta gẹ Chileke nata iya. ⁷ Ọ s̄uru:

“Ẹhu-utso bẹ a ḡoru n̄u ndu a ḡuru nv̄u

l'iphe, ẹ̄phe mesweru; ndu a

saf̄ubebewaar̄u iphe-ẹ̄ji, ẹ̄phe megbab̄eru.

⁸ Ẹhu-utso b̄u k'onye Nnajīuphu taa

ḡukoeduru iphe-ẹ̄ji ililekp̄o.”*

⁹ ?Ọ d̄u g'ọ b̄uepho ndu buru úbv̄u kp̄eekpu bẹ Chileke ep̄fu l'ẹka-a g'ẹhu ts̄o utso? T̄o; ?ndu ebuduru úbv̄u ȳi iya-a? Eshinu anyi s̄uru: “Ébirihamu kwetar̄u kẹ Chileke; a ḡuaru iya ya l'ap̄f̄ubekoto.” ¹⁰ ?D̄enu g'eshiru ḡuaru iya ya? ?B̄u teke o toko budu úbv̄u; t̄o g'o buwaru úbv̄u? Ọ ḡadaru iya ya t̄eme o bua úbv̄u. ¹¹ Úbv̄u ono, o buru ono b̄uru iphe-ọ̄hubama, goshiru lẹ Chileke ḡuru iya r̄o l'onye p̄f̄uberekoto; kẹle o kwetar̄u kẹ Chileke teke o toko budu úbv̄u. Ọo ya b̄u gẹ Ébirihamu ab̄uru nna k'iphe, b̄ukpoo ndu woru onwoph̄e ye Chileke l'ẹka; ndu Chileke ḡuru lẹ ndu p̄f̄uberekoto l'ẹbe ab̄u l'ẹ̄phe buru úbv̄u. ¹² Ọ b̄ukwarupho nna ndu buru úbv̄u; ọle ọ t̄o b̄ukwa nna ph̄e; op̄fu l'ọo l'ẹ̄phe buru úbv̄u; iphe, o gude b̄uru nna ph̄e b̄u l'ẹ̄phe tsoru ẹka Ébirihamu, woru onwiya ye Chileke l'ẹka t̄eme o bua úbv̄u.

Ọ̄phu b̄u ishi b̄u ekweta

¹³ Chileke kweru Ébirihamu ȳe awa iya ukwe-iphe s̄u ph̄e: l'ọo ph̄e e-nweru mgboko. Ọ t̄o b̄ukwa lẹ Ébirihamu meru iphe, ekemu pfuru meru iphe, o gude

* 4:8 4:8 Ḡunaa Ebvu 32:1,2.

kwe iya ukwe-iphe ono. O kwa l'o kweru ke Chileke meru iphe, Chileke guru iya ya l'apfubekoto. ¹⁴ Su-a; ome o bu ndu eme iphe, ekemu pfuru be e-nweru mgboko ono, Chileke kweru ukwe iya ono me ekweta aburu iphe-mmanu; me ukwe-iphe, Chileke kweru tege vukwarupho ire. ¹⁵ Kele ekemu akpatsuje oke-ehu-eghu. Noo l'eka ekemu adudu be emeswe adukwapho.

¹⁶ Noo g'o gude iphe, Chileke kweru ukwe iya ono buru iphe, shi l'ekweta; g'ee-shi g'oo-buru iphe, shi l'eze-iphe-oma, oome; mbu ophu o mekwarupho gbafe awa Ebirhamu. O to bukwapho ndu emeje iphe, ekemu suru g'e meje kpurumu. Chileke dobekwaru iya pho iphe, bu ndu kwetaru nu ge Ebirhamu kwetaru. L'o kwa Ebirhamu bu nna anyi g'anyi hakotakpoo. ¹⁷ O buru iya bu iphe, e deru su: "Mu meakwaru ngu nna igwerigwe oha." Oo ya bu le Ebirhamu bu nna anyi l'iphu Chileke, bu onye o kweru nkiya; mbu Chileke, emeje ndu nwuhuru anwuhu g'ephe dzuru ndzu ozo; teme o nodu emeje iphe, eshihaada du nu l'oo-bya adu. ¹⁸ Ebirhamu woru onwiya ye Chileke l'eka; bya anodu ele enya iphe; teke adudu iphe, o tuseru ele enya iya. Oo ya bu; o buru nna ohamoha, du igwerigwe, bu iya bu nu iphe, e pfuru iya su: "Noo g'awa ngu a-ha bu ono."

¹⁹ Ophu o dudu teke Ebirhamu kwenyaaru ke Chileke bya akpohaa okpolohu. Ophu o pfuduru kele ya kahwaru; libahuchawaa alibahu ophu ya a-duedu ike eye ime; l'eka o nowaru iphe, ha g'ukporo apha ise eshinu a nwuru iya; ophu o pfuduru ke nyee ya, bu Sera, ata tsudu ime. ²⁰ O to dudu teke obu bojeru iya ebo l'iphe, Chileke kweru iya ukwe iya; kele o noshierupho ike l'eka Chileke akwabee ya pho ubvu. ²¹ O dokporu iya enya okpobe edodo le Chileke suru emekota iphe, o

kweru iya ukwe iya. ²² Noo g'o gude Chileke gɔ̄aru iya ya l'apfubekoto. ²³ Ọ tọ bɔ̄kwa l'iswi ẹhu ẹbirhamu kpɛekpu bẹ e dedoru iphe ono, e deru sɔ̄: A gɔ̄ru iya ya l'apfubekoto. ²⁴ Ọ kwa l'iswi ẹhu anyibedua bẹ e dedokwaru iya pho, bɔ̄ ndu Chileke e-mechaa gɔ̄a lẹ ndu pfuberekoto; mẹ o -bɔ̄ru l'anyi kweru kẹ Chileke, bɔ̄ iya bɔ̄ onye meru Nnajiuphu anyi, bɔ̄ Jizos̄u; o shi l'onwu teta dzuru ndzu. ²⁵ Jizos̄u ono bẹ Chileke haru; o gude onwiya gwee ẹja nwuhu k'ophu oo-gwefu iphe-ẹji, anyi meshiru. Chileke bya emee ya; o shi l'onwu teta dzuru ndzu g'e-shi gẹ ya agɔ̄a anyi lẹ ndu pfuberekoto.

5

Adu lẹ mma onye lẹ Chileke

¹ Ọo ya bɔ̄ lẹ Chileke gɔ̄waru anyi lẹ ndu pfuberekoto opfu l'anyi kweru nkiya. Nta-a bẹ anyi shiwa l'ẹka Nnajiuphu anyi, bɔ̄ Jizos̄u Kéreshi; ẹhu dɔ̄waa anyi guu l'onodu anyi lẹ Chileke. ² Ọo Jizos̄u Kéreshi ono shi l'ekwekwe, anyi kweru nkiya duba anyi l'eze-iphe-oma ọwanawa, anyi gude dzuru ndzu-a. Ẹhu nọdu anọduje atsọ anyi l'anyi ele ẹnya l'anyi lẹ Chileke e-mechaa gbaru mba l'odu-biribiri iya. ³ Ọ tọ bɔ̄kwaa ono kpurumu; ẹhu atsojekwapho anyi uto mẹ anyi nọdu eje iphe-ẹhuka; opfu l'anyi humawaru l'oo l'iphe-ẹhuka bẹ eeshije nwuta ata nshi. ⁴ Ọ bɔ̄ru ọta-nshi emeje g'anyi shihu ike l'ohutama. Anyi eshi ẹgube ono kabaa apfushi ike l'iphe, anyi ele ẹnya iya. ⁵ Ọphu ele ẹnya iphe ono, anyi ele ono emebyidu anyi iphu; kẹle Chileke l'onwiya mewaru anyi gbẹ l'ẹka Unme-dɔ̄-Nsọ, o nuru anyi maru gẹ n-yemobu iya habe shii.

⁶ L'ọ kwaduro teke adudu ike, du anyi k'eme iphe, du ree l'iphu Chileke bẹ Kéreshi byaru bya anwuhu-chiru

ndu ata tsudu Chileke ebvu. Iphe ono buru teke Chileke tumberu be o meru. ⁷ Kele o dukwa le nita ge nemadzu e-shi nwuhu-chiru onye pfuberekoto. O le -choje iya be aa-humakwaa onye a-nwuhu-chiru onye oma. ⁸ Obenu le Kereshi nwuhuru l'iswi ehu anyi teke anyi bukwa du ndu eme iphe-eji; shi nno goshi le Chileke yenukaru anyi obu. ⁹ Oo ya bu l'eshinu Chileke shiwaa l'anwuhu, Jizosu nwuhuru; gu anyi le ndu pfuberekoto l'iphe iya be oo-kabakpokwanu adu ike shi l'eka Kereshi ono dzota anyi; g'a taa tu-koshidu anyi oke-ehueghu iya. ¹⁰ Su-a; eshinu anyi shi buru ohogu Chileke; Chileke bya eshiwaa l'anwuhu, Nwa iya nwuhuru mewaa anyi buru onya iya; be nta-a, anyi buwaa onya iya-a be ndu Kereshi ophu no anyi l'ehu a-kabakpokwaanu adzota anyi l'oke-ehueghu Chileke. ¹¹ Ophu o budua ono kpoloko; anyi nokwapho l'eka Nnajiuphu anyi, bu Jizosu Kereshi ete eswa; mbu onye ono, meru anyi le Chileke doshiwaa ono.

Adamu le Kereshi

¹² Su-a; o kwa nwoke lanu be iphe-eji shi l'eka bata le mgboko. Onwu shikwapho l'iphe-eji ono batakwapho le mgboko. Oo ya bu; onwu shi nno swiru iphe, bukpo nemadzu; kele onyemonye mewaru iphe-eji. ¹³ Iphe-eji dzuhaakwaru eliphe teme ekemu bya. O le a ta gukoduru nemadzu iphe-eji l'eka ekemu adudu. ¹⁴ O le onwu shielaa l'ogbo ke Adamu phe buru eze jasu l'ogbo ke Mosisu; mbu buchaaru eze ndu emesweduru ekemu ge Adamu mesweru.

Adamu l'onwiya bu onyonyo Kereshi, bu iya bu onye ophu, e-mechaa byanu pho. ¹⁵ Obenu l'iphe-oma ke Chileke be a ta tukwa eyeru iphe-eji ke Adamu. Kele o -buru l'iphe-eji, onye lanu meru; be meru a du igwerigwe nwuhu; nokwapho ge Chileke a-kabakpo

eshi l'ẹka onye lanu ono, bu Jizosu Kereshi meeru ndu du igwerigwe eze-iphe-oma, nyiberu anyibe. ¹⁶ Ophu iphe-oma ke Chileke adukwanu ge iphe-aji, onye lanu meru. L'ikpe, nmakotaru ndiphe mgburugburu k'iphe-aji ono. Obenu l'iphe-oma ophu Chileke meru nyiberu igwerigwe iphe-aji; shi nno mee aguhaa ndiphe le ndu pfuberekoto. ¹⁷ Kele eshinu o bu emeswe, onye lanu mesweru be onwu shi l'ẹka onye lanu ono buru eze; be ndu ono, shiwaa l'ẹka Jizosu Kereshi nata eze-iphe-oma ke Chileke ono, bu iphe-oma ophu nyiberu anyibe ono; waa iphe-oma ophu bu apfubekoto; ndu ono a-nodu l'ẹka onye lanu ono, bu Jizosu Kereshi buru eze le ndu-a.

¹⁸ Oo ya bu l'oo g'emeswe, onye lanu mesweru kparu iphe, Chileke nmakotaru onyemonye ikpe; bukwapo ge Chileke shi l'apfubekoto Kereshi mee g'ikpe kaleru onyemonye ge ndu du phe. ¹⁹ Kele oo ge nwoke lanu ono meru iphe, Chileke suru g'o to meshi; e shi egube ono mee ndu du igwerigwe phe buru ndu iphe-aji; bukwapo g'ee-gude k'onye lanu ophu meru iphe, Chileke suru g'o mee; Chileke agua ikpoto nemadzu le ndu pfuberekoto.

²⁰ Iphe, e gude e mecha tu ekemu dobe bukwa g'a kabaa amaru g'iphe-aji habe shii. Obenu l'oo teke a kabaa amaru g'iphe-aji habe shii; eze-iphe-oma ke Chileke akwata kabakwaapho shii. ²¹ O kwa anwuhu be iphe-aji gude buru eze. Nokwapo g'o bu apfubekoto be eze-iphe-oma ke Chileke gude bukwarupho eze. O buru apfubekoto ono, shi l'ẹka Nnajiuphu anyi, bu Jizosu Kereshi ono edu anyi ala le ndu ophu onwu ta aduhedu.

6

Iphe, baputizimu eme

¹ Sụ-a; ?bụ awe bẹ anyi sụberu iya ishi nta-a? ?Anyi a-nọduje eme iphe-ẹji g'eze-iphe-oma kẹ Chileke aka shii tọ? ² Tụswekwa! ?Denu g'anyibe ndu nwụhuwaru anwụhu l'iphe-ẹji e-shi nọdukwapo ndzụ l'ime iya ọzo? ³ Tọo ?unu ta amadụ l'e shiwaa lẹ baputizimu mee anyi dụ igwerigwe bụru ndu a tųgbaberu l'anwụhu ono, Kéreshi ono? ⁴ Lẹ teke ono, e meru anyi baputizimu ono bẹ anyi l'iya tųkoakwaru nwụhu; a tųko anyi l'iya likota. Oo ya bụ lẹ-a; ọo ẹgube ono Kéreshi gude ike akpabiri kẹ Nna shi l'ọnwu gbalihu dzuru ndzụ ono bụkwapho g'anyi a-dụ ike dzuru ndzụ ọphúú.

⁵ O -bụru l'anyi lẹ Kéreshi tųgbaru bụru nanụ l'anwụhu, dụ g'ọphu ọ nwụhuru; ọ n'iya bụ Chileke emee g'anyi shi l'ọnwu teta g'o meru iya; anyi l'iya adzuru ndzụ ọphúú. ⁶ Ọphu anyi maru bụ ọwa-a: l'e wotaru akahụ onye anyi shi bụru woru yẹe Kéreshi tųko kpọpyabe l'oswebe; ọo ya bụkwanu; g'ee-mebyia ike k'ẹjo obu ono, anyi shi nweru teke ono, bụepho iphe-ẹji bẹ anyi shi maru ono; g'anyi ata abụeduru ohu k'iphe-ẹji. ⁷ L'ọ kwa teke nemadzụ nwụhuru bụ teke yẹle ike k'eme iphe-ẹji tọkaharu ishi anamu. ⁸ Teke ọ bụkwanu l'anyi lẹ Kéreshi tųgbaru nwụhu bẹ anyi maru l'anyi l'iya a-tųkokwapo dzuru ndzụ. ⁹ L'iphe doru anyi ẹnya bụ l'eshinu Chileke meru gẹ Kéreshi shi l'ọnwu teta dzuru ndzụ bẹ ọ tọ nwụhubaedu ọzo. Anwụhu ta abyadụ akabaa ya ike ọzobaa. ¹⁰ Anwụhu ọphu ọ nwụhuru bụ l'ọ nwụhuru mgbo lanụ kpoloko kpẹekpu g'o mekpee iphe-ẹji. Ndzụ ọphu ọ dzụ nta-a bụwaru gẹ yẹe Chileke bụru nanụ jasụwaruroya. ¹¹ Nokwapho g'unu a-guje onwunu l'unu bụwaa ndu nwụhuru anwụhu mẹ a -bya l'ẹka iphe-ẹji nọ. Ọle eshinu unu lẹ Kéreshi Jizọsu tųgbawaru bụru nanụ bẹ bụwaa Chileke bẹ unu dzuru ndzụ.

¹² Unu te ekwekwa g'iphe-ẹji bụru eze l'ẹhu unu ọwa-

a, bu ɔphu a-nwuhu anwuhu-a; k'ɔphu bu l'ɔo ɛjo-
 iphe, agu unu, ɔ sɔru g'unu mee be unu e-meje. ¹³ Unu
 te ewokwaru iphe, nɔ unu l'ɛhu g'ɔ hahabe nwanshii
 haaru iphe-ɛji g'ɔ buru iphe, o gude ejepfu iphe, pfuru
 ɔto ɔgu. ɔ chia iphe, unu e-me bu g'unu woru onwunu
 hagbuaru Chileke l'unu buwaa ndu shi l'onwu futa bya
 anɔdu ndzu. ɔo ya bu ge Chileke egude unu alwu
 ɔgu iphe, pfuru ɔto. ¹⁴ Iphe-ɛji ta akaedu unu ike;
 eshinu ekemu ekeɛduru unu ɛgbu; kele nta-a be Chileke
 gudewaa eze-iphe-oma iya to unu l'ɛgbu ekemu ono.

Aburu ohu k'apfubekoto

¹⁵ Su-a; ?ɔ pfuru l'anyi anɔduwaro eme iphe-ɛji; opfu
 l'eze-iphe-oma ke Chileke tofuwaru anyi; ebe ekemu
 ekeɛduru anyi ɛgbu to? Tuswekwa! ¹⁶ Unu ta amahaadaa
 le teke unu woru onwunu haaru nemadzu bya emeje
 iphe, o pfuru g'ohu iya be unu buwaa ohu onye obu,
 unu emeje iphe, o pfuru obu. Teke ɔ bu l'unu woru
 onwunu haaru iphe-ɛji; buru ohu iya; unu anwuhu
 anwuhu, bu iphe, tso iphe-ɛji l'azu. Teke ɔ bukwanu
 l'unu emeje iphe, Chileke pfuru; ɔo ya bu l'ɔo-gua unu
 le ndu pfuberekoto l'iphu iya. ¹⁷ ɔle mu ekele Chileke
 ekele l'ɔ duru teke unu shi buru ohu iphe-ɛji; obenu
 le nta-a be unu gudewaa obu unu g'ɔ ha eme iphe, bu
 ɔkpobe-opfu ono g'e ziru iya unu. ¹⁸ Eshinu a towaru
 unu l'ɛgbu, iphe-ɛji shi kee unu be unu buwaa ohu
 k'apfubekoto. ¹⁹ Mu gudeakwa ɛhu ohu le nnajiuphu iya
 anmaru unu etu; ɔdumeka be iphe, mu epfu te edokwa
 unu enya. Egube ono unu shi woru onwunu haaru ɛjo
 umere, rehuru erehu; waa akabaa eme iphe, apfuduru-
 ɔto g'e-shi g'iphe-ɛji akabaa shii ono; bukwaphe g'unu
 e-woru onwunu haaru eme iphe, pfuru ɔto nta-a; g'e-shi
 ge ndzu unu abukotaru ke Chileke.

²⁰ Kẹle teke unu shi bụru ohu iphe-ẹji; bẹ unu eshidu eyeru apfubekoto ọnu. ²¹ ?Buhunu urwu gunu bẹ unu ritaru l'ẹjo-iphe ono, unu shi eme ono; mbụ iphe ono, iphere iya byaru adu unu nta ono? Kẹle ẹka iphemiphe ono sụberu ishi bukwa anwuhu. ²² Obenu lẹ nta-a bẹ a tọwaru unu l'ẹgbu ono, iphe-ẹji shi kee unu ono; unu bụwaru ohu Chileke. Urwu, unu ritaru iya bụru lẹ ndzụ unu bukotawaa kẹ Chileke. Ẹka ọ sụberu ishi bụru ndzụ ojejoje. ²³ Ugwo, aanata l'iphe-ẹji bukwa anwuhu; iphe-oma, Chileke eme bukwanuru ndzụ ojejoje ọphu shi Nnajiuphu anyi, bụ Jizosu Kéreshi l'ẹka.

7

Ẹtu iphe, emeje nụ l'alulu

¹ Sụ-a; unwunna mu; ?unu ta amadu lẹ teke ekemu bu-beru ishi lẹ ndzụ nemadzụ bu teke onye ono nọ ndzụ? Ọ kwa unubẹ ndu tukururu maru ekemu bẹ mu epfuru. ² Kẹle ekemu bu lẹ nwanyi, alu ji nọfutaje l'ẹka ji iya jasukporu teke ji iya l'a-nọ-beru. Ọle teke a nọnyaaru; ji iya nwuhu bẹ o nwewaa onwiya. Ekemu ono, shi gudepyabẹ iya nụ ono ta aduedu iphe, ọ bu. ³ Bu iya bu lẹ teke ji iya nọkwadu ndzụ; o je aluru ji ọzo; l'aasu l'oori ogori; teke ọ bu lẹ ji iya nwuhuwuru; l'ọ bụru nwanyi eke ji. Ekemu te egudepyabedu iya. Ọ tọ buedu iya eri ogori mẹ o -je aluru ji ọzo. ⁴ Sụ-a; noo g'ọ du l'ẹhu unu bu ono; unwunna mu. Ọo ekemu shi bụru ji unu; ọle unu lẹ Kéreshi tugbawuru nwuhu. Ọo ya bu l'eshi ọphu unu nwuhuwuru bẹ ekemu abuedu ji unu. Ẹbe ọ duedu iphe, unu l'iya jigba. E mechaa; unu bya adzuru ndzụ ọzo teke ono, Kéreshi tetaru dzuru ndzụ ono. Nta-a, bẹ bụwaa onye ono, shi l'onwu teta dzuru ndzụ ono bu ji unu; k'ọphu anyi a-dzuru ndzụ, pfuru ọto meje iphe, du Chileke ree. ⁵ Kẹle teke ono, anyi shi nọdu ndzụ eme

g'ọ guru anyi ono bẹ ẹgu ẹjo-iphe, shi anọduje enwu phuruphuru l'ẹhu anyi meru anyi shi anọduje eme iphe-ẹji. Iphe, tso eme iphe-ẹji ono bukwanuru ọnwu. ⁶ Ọle nta-a bẹ a dzọwaru anyi l'ẹka ekemu. Anyi nwuhwaru; nahu iphe ono, shi kee anyi ẹgbu ono. Ọo ya bu l'anyi etsowaa ọzo ndzu ọphuu ọphu shi l'ẹka Unme-du-Nso ejeru Chileke ozi. Anyi te etsohedu akahu ọzo ono, bu iya bu ekemu ono, e deru l'ekwo ono gude eje iya.

Ekemu waa iphe-ẹji

⁷ ?Bu gunu bẹ anyi e-pfu nta? Ekemu l'onwiya ?o bu iphe-ẹji to? Tuswekwa! Mu tege amakwaru iphe, bu iphe-ẹji; ọme ekemu ta adu. Mu tege amakwaru iphe, bu nchamenya ọme ekemu ta asu: "G'iphe onye ọzo ta agujekwa ngu." ⁸ Iphe-ẹji shinu l'ekemu ono kpata ọzo je akpatsushia mu iphe, bukpo ẹgu ẹjo-iphe ọzo, dugbaa nu. Kele ekemu -adudu bẹ iphe-ẹji nwuhukwaru anwuhu. ⁹ Mbẹdua l'onwomu duru teke mu shi nodu ndzu; ọphu mu amadu k'ekemu. A nonyaa mu bya amaru k'ekemu ono; iphe-ẹji jakerehu mu l'ẹhu; o buru mu anwuhu. ¹⁰ Ekemu onoya bu ekemu, gege eme g'a nodu ndzu ono gbẹ bya aburu ikpe bẹ o nmaru. ¹¹ Kele iphe-ẹji kpataru ọzo; gude ekemu ono wopyabe mu l'ugho; shi l'ekemu ono woru mu gbua.

¹² Ọo ya bu l'ekemu l'onwiya du nsọ. Iphe ono, a suru g'e meje ono du nsọ; bya aburu iphe, pfuru oto; bya adu ree. ¹³ ?O pfuru l'ọo iphe ono, du ree ono gbẹ kpataru mu anwuhu to? Tuswekwa! O kwa iphe-ẹji gude iphe ono, du ree ono kpataru mu anwuhu g'ee-shi g'iphe-ẹji aburu iphe, aa-huma l'o bu iphe-ẹji. Ọo ya bu le Chileke shi l'iphe, e deru l'ekemu eme g'iphe-ẹji goshigbua ge yẹbe iphe-ẹji du-be ideyideyi.

Iphe labo adzo ẹnya l'ẹhu amadu

¹⁴ Iphe, anyi maru bu l'ekemu shi Unme Chileke l'eka; obenu le mu bu nemadzu mmanu, iphe-aji gbaru ohu. ¹⁵ Umere mu l'onwomu agbachijekwa mu enya; kele mu te emejedu iphe, du mu g'a su le mu meru iya. Iphe, mu emejechia bu iphe, du mu ashi ememe. ¹⁶ Su eshi ophu iphe, mu agbeje eme bu iphe, mu maru l'o to dudu mu ree; o ya bu le mu kweru l'ekemu du ree. ¹⁷ O n'ia-a bu l'o to bu du mbedua l'eme iya. Iphe, eme iya nu bu iphe-aji ono, buwaa mu ebubu l'ehu ono.

¹⁸ L'iphe, mu maru bu l'o to dukpoda iphe, du ree, no mu l'obu ililekpoo, bu iya bu l'obu egube nemadzu, mu shi buru teke mu shi anoduje eme ajo-iphe, agugbabe mu nu. Mu emeje ge mu mee iphe, du ree l'ememe; ole mu ta adujedu ike mee ya. ¹⁹ Kele mu te emejedu iphe, du ree, du mu g'a su le mu meru iya. O 'epho ajo-iphe ono, ata dudu mu ge mu mee ya ono be mu emeje. ²⁰ Su-a; o -buru l'iphe, mu agbeje eme bu iphe, adudu mu ree; o n'ia bu l'o to bu du mbedua l'eme iya. Iphe, eme iya nu bu iphe-aji ono, buwaa mu ebubu l'ehu ono.

²¹ Noo ya bu; mu shi egube ono huma ekemu, du adudu; l'o bujeru; teke mu eme ge mu mee iphe, du ree; o buerupho ajo iya akpataje mu uzo l'ehu. ²² Mu -bya l'ime onwomu be ekemu ke Chileke anodujekpokwaa ats'o mu utso l'obu. ²³ Obenu le mu humaru ekemu ozo, anoduje adzo uzo l'ehu mu. Ekemu k'ono be yele ekemu ophu du mu ree l'egomunggo pho anoduje akpa enya. L'o tua mu mkporo kpuru mu nu iphe-aji. O buru ekemu k'ono be aatujeru mu ekemu ophu kpu mu le ndzu. ²⁴ Nshio mu! ?Bukpoo onye a-dzo mu l'ogwehu owa-a, edu mu ala l'onwu-a? ²⁵ Nta be mu no l'eka Jizosu Kereshi, bu Nnajiuphu anyi ekele Chileke ekele. Mb'u le mu egudeje egomunggo eme ekemu ke Chileke l'onwomu; mu egude anu-ehu mu eme ekemu k'iphe-aji.

8

Unme, l'anuje ndzụ òphúú

¹ Ọo ya bụ ịe ntamanụ-a bẹ ọ tọ duedu ikpe, nmakwaduru ndu nọ l'ẹka Kéreshi Jizọsu; ndu te emeedu iphe, agụ phẹ ẹgu ememe; gbahaa iphe, Unme Chileke sụru g'ẹphe mee. ² Kẹle ekemu ọphu Unme Chileke aturu mu nta-a bụ ike, eshije Kéreshi Jizọsu l'ẹka duru nemadzụ bahụ l'uzo ndzụ. Ọ bụru ike ono tọfuwaru mu l'ike k'ekemu, bụ iya eshije l'iphe-ẹji duru nemadzụ bahụ l'anwuhu. ³ Iphe, ekemu adudu ike mee opfu ịe nemadzụ ta adujedu ike mee g'ekemu pfuru bẹ Chileke mewaru. Ọ yewaru Nwa iya gẹdegede; ọ bya aburu nemadzụ; nweru anụ-ẹhu, iphe-ẹji anọduje akpasa ụzo l'ẹhu g'ẹhu k'anyi; bya emee onwiya ngweja gwefu iphe-ẹji, anyi meru; shi nno mebyia ike k'iphe-ẹji ono. Chileke shi l'ẹhu ono, Kéreshi nweru ono nmaa iphe-ẹji ikpe. ⁴ Iphe, Chileke gude mee iphe ono bụ k'ọphu anyi adu ike meebekota iphe, pfuru ọto ono, ekemu pfuru ono. Kẹle nta bụwaa Unme Chileke bẹ anyi etso; anyi te etsoedu anụ-ẹhu. ⁵ Kẹle ndu etso anụ-ẹhu buepho g'ẹphe e-me mee iphe, du anụ-ẹhu ree bẹ aduje phẹ l'obu. Ndu etso Unme-du-Nsọ bụru iphe, ọ sụru g'ẹphe mee bẹ ẹphe emeje. ⁶ Kẹle akporu obu ye l'eme iphe, du anụ-ẹhu ree bụkwa ọnwu; akpokwanuru obu ye l'eme iphe, du Unme-du-Nsọ ree bụru ndzụ waa ẹhu àgù. ⁷ Noo kẹle akporu obu ye l'eme iphe, du anụ-ẹhu ree bụ ọhogu Chileke; kẹle o too tsodu ekemu Chileke; ọphu ọ byadu etso iya. ⁸ Ọphu ndu emeje iphe, du anụ-ẹhu ree 'abyadu adu ike mee iphe, du Chileke ree.

⁹ Obenu l'unubedua te emejedu uche unu. Ọ bụwaa iphe, Unme-du-Nsọ epfu bẹ unu eme; bụkwa mẹ ọ -buru-a ịe Unme kẹ Chileke buphọ ebubu l'ime ẹhu unu. Iphe, bụkpoo onye enwedu Unme kẹ Kéreshi ono

ta abụkwa onye nkiya. ¹⁰ Teme l'ọ -bụru ịe Kéreshi bu unu ebubu l'ẹhu; be ogwẹhu unu ta anọkwa ndzụ eme iphe-ẹji; obenu ịe Unme Chileke bụwaa ndzụ l'ẹhu ndu pfulberekoto. ¹¹ Teke ọ bụ ịe Unme ke Chileke ono, meru ge Jizosu shi l'onwu teta dzuru ndzụ ono, bu l'ime unu; ọo ya bụ ịe yẹbedua ono, meru ge Kéreshi Jizosu shi l'onwu teta dzuru ndzụ ono l'e-mekwapho g'ẹhu unu ono, bụ ọphu a-nwuhu anwuhu ono dzuru ndzụ. Chileke e-shi ịe Unme-dụ-Nso ono, bu unu l'ẹhu ono mee iphe ono.

¹² Ọo ya bụ; unwunna mu; anyi jikwa ugwo, abudu g'anyi meje iphe, dụ anụ-ẹhu ree. ¹³ Ịe teke unu eme iphe, dụ anụ-ẹhu ree be unu a-nwuhukwa anwuhu. Obenu teke ọ bụ l'unu shi l'eka ke Unme-dụ-Nso kpagbua umere ono, shi l'anụ-ẹhu unu ono; ọo ya bụ; unu anodu ndzụ. ¹⁴ L'ọ kwa iphe, bụkpoo ndu kweru ge Unme-dụ-Nso bụru onye a-nodu edu phe nụ bụ unwu Chileke. ¹⁵ Ịe Unme-dụ-Nso, Chileke nuru unu ta abụkwa Unme, e-me g'unu bụru ohu k'ọphu ndzụ a-nodu agụ unu. Ọchia iphe, unu nataru bụ Unme, e-me g'unu bụru unwu ke Chileke; anyi shi egube ono arakuje iya sụ: “Abba! Nnana!” ¹⁶ Ọ bụru Unme Chileke ono l'onwiya be anoduje agba ekebe l'obu anyi l'anyi bụwaa unwu ke Chileke. ¹⁷ Ọo ya bụ l'ọ -bụru-a l'anyi bụwaa unwu iya; ọ n'iya bụ l'anyi bụwaa ndu Chileke a-nụ iphe, o kweru unwu iya ukwe iya. Ọo-nụ anyi iphe ono, ọ nwaru Kéreshi ono. L'ọ -bụru-a l'anyi ịe Kéreshi tughbaru eje iphe-ẹhuka be Chileke e-mechakwaa mee g'anyi gbaru mgba l'odu-biribiri ke Kéreshi.

Ọdu-biribiri ọphu dụ l'iphu

¹⁸ Iphe, doru mu enya bụ l'iphe-ẹhuka ọwana, anyi eje nta-a ta asukpoda nụ g'ee-wota iya atụ eyeru egube ọdu-biribiri, Chileke e-mechaa dobe anyi. ¹⁹ Iphemiphe,

Chileke meru ememe be ɔnma anmanma l'ehu g'ephe huma teke Chileke e-goshi unwu iya l'odu-biribiri ono. ²⁰ Kele iphemiphe ono, Chileke meru ememe ono be Chileke turu onu g'o tuko buru iphe, laru l'iswi. Ebe o bukwa iphemiphe, Chileke meru ememe meru iphe-aji k'onwiya. O kwa iphe, tso ikpe, Chileke nmaru nemadzu le nemadzu mesweru. O le Chileke mekwapho g'iphemiphe ono, o meru ememe ono lekwapho enya ²¹ l'ujiku lanu be ya a-goshi onu ono, o turu iya su g'o rekashihu ono. Oogbe teke ono mee g'iphemiphe ta abuheru ohu iphe-aji; g'o bahu-chia l'odu-biribiri k'unwu yebe Chileke. ²² Iphe, anyi maru bu l'iphemiphe, Chileke meru ememe l'atsugbaa ude iphe-ehuka ge nwanyi, ime eme; mbukwa byasu nta-a. ²³ O le o to bulekwa phe-a kpurumu. Anyibedua l'onwanyi, bu ndu nwewaru Unme Chileke; mbu Unme, Chileke yeru anyi l'ehu gude goshi le ya e-mechaa meeru anyi iphe ono, o kweru anyi ukwe iya ono; l'atsukwapho ude; g'anyi ele enya ge Chileke mee anyi g'anyi buru unwu iya, g'o gbata ogwehu anyi l'ophu. ²⁴ Kele a dzotawaru anyi; o buru iya bu iphe, anyi elekwadu enya teke oo-dzu oke. Kele o -buru le nemadzu natawaru iphe, oole enya iya; ?o lekwadu enya iya ke gunu ozobaa? ²⁵ Teke anyi teke anadadu iphe, anyi ele enya iya; oo ya bu; anyi ata nshi nodunupho ele enya iphe obu.

²⁶ Nokwapho ge Unme Chileke anoduje eyeru anyi aka; kele ike ta adudu anyi; teme ebe o budu l'anyi maru g'e pfuje anu Chileke g'o gbaru anyi. Oo ya bu l'oo Unme-du-Nso l'onwiya egudeje atsu ude ophu buepho yebedua maru iphe, o pfuru epfu anuru anyi Chileke. ²⁷ Oo Chileke, bu yebedua, l'enyoje ime obu nemadzu be mawaru iphe, bu uche ke Unme-du-Nso; kele Unme-du-Nso anoduje epfu anu Chileke l'iswi ehun du-nsu le g'o

dụ Chileke ree.

²⁸ Anyi maru l'iphemiphe, eme l'ẹhu ndu yeru Chileke obu anọduje emekọta g'ọo-duru phẹ lẹ ree; mbụ ndu Chileke kuru g'ọ tumberu. ²⁹ Kẹle Chileke mahawarụ ndu nkiya tẹme mgboko dụ; bya ahọtahawaa phẹ g'ẹphe bụru ndu a-dụ gẹ Nwa iya dụ; gẹ Nwa iya ono bụru ọgerenya mẹ a -gụjekwanu ụnwunna iya l'ophu. ³⁰ Ọo ndu Chileke họtahawaru bẹ o kuru. Ọ bụru ndu ono, o kuru ono bẹ ọ gụru lẹ ndu pfulerekoto. Ọ bụru ndu ono, ọ gụru lẹ ndu pfulerekoto ono bẹ o dobewaru l'odu-biribiri iya.

N-yemobu Chileke l'ẹhu ndu kẹ Kéreshi

³¹ ?Bụ ọnu gụnu bẹ anyi e-yebaa l'iphemiphe ono nta? Ọ -bụru lẹ Chileke agbaru anyi ọdzori; ?bụ onye sụru g'oo-me anyi gụnu? ³² Mbụ onye ono te sephuduru Nwa iya azụ; obenu l'ọ gbẹchia duru iya ye g'ọ bya anwuhuchiru anyi g'anyi ha. ?Bụ ẹgube iphe gụnu bẹ ọ tọo gbẹdu Nwa iya ono l'ẹka nụ anyi kẹ mmanụ? ³³ ?Bụ onye sụru eku ndu Chileke họtaru ikpe? L'ẹka ọ gbẹ bụwaru Chileke l'onwiya meru g'ikpe kalẹru phẹ. ³⁴ ?Bụ onye bẹ sụru phẹ anma ikpe? Ọo kwa Kéreshi Jizọsu l'onwiya bụ onye gude iswi ẹhu phẹ nwuhu. Ọphu ọ buledaa ono kpẹekpu; ọphu kachaakponu bụ l'o shi l'onwu teta dzuru ndzụ je anọdu l'ẹkutara Chileke epfu anuru anyi Chileke. ³⁵ ?Ọ dukpooru iphe, sụru akpọshi gẹ Kéreshi te eyehe anyi obu? ?Bụ eje iphe-ẹhuka; tọo oke mkpa; tọo mkpawere; tọo ẹgu ememe; tọo ta ahuma iphe, gagbobe l'upfu? ?tọo iphe, alọ ishi onwonye alọlo? ?Tọo l'e gbugburu anyi lẹ mma sụru iya ememe? ³⁶ Ọ ọdu g'iphe, e deru sụ:

“Ọo l'iswi ẹhu ngu bẹ ọ tọ
dụdu teke

Ọnwu ta anỌdujedu
eme g'o gbua anyi
mbọku-mbọku.

AanỌduje eme anyi g'aturu,
a chitaru eje egbushi.*”

³⁷ Ọ tọ ọkpodaa; noo l'iphemiphe ono e-mekọta; ọle anyi eshije l'ẹka onye ono, yeru anyi obu onoya kakọta iya ike; mekpee ya. ³⁸ L'ọphu doru mu ẹnya bụ l'anwuhu; ọzoo ndzu; ọzoo ndu ojozi-imigwe; ọzoo ndu ọchi-ọha imigwe; ọzoo ndu ọkphehu du; ọzoo iphe, du nta; me ọphu e-mechaa du nu; ³⁹ ọzoo igwe; ọzoo ali; ọzokpoo iphemiphe ọzo, Chileke meru ememe; ta adudu ọphu suru akposhi ge Chileke te eyehẹ anyi obu ọphu, o shi l'ẹka Nnajiuphu anyi, bụ Kéreshi Jizọsu yee anyi.

9

Chileke lẹ ndu ọ họtaru

¹ Iphe, mu epfu bụ ọkpobe-opfu. Mu bụ onye ke Kéreshi; ebe mu adzudu ọka. Unme-du-Nsọ bu mu ebubu l'ime obu bya emeje g'obu mu marwetaje iphe, gbaru iya nu. Ọ buru obu mu ono meru g'o doo mu ẹnya lẹ mu ta adzudu ọka. ² Aphu ejije mu obu. Ebe ọ dudu teke ọ tọ ọdujedu atsu mu l'ehu; k'ọphu oorwujehaa mu l'anu mee ³ Ọduje mu g'a su lẹ mu bụ onye a turu ọnu; ọphu mu lẹ Kéreshi atugbaeduru; me ọ -buru l'ọo iphe ono a-dzo ndu anyi lẹ phe bụ mee lanu; ⁴ bụ iya bụ unwu Izurelu. Ephebedua be Chileke họtaru g'ephe buru unwu iya. Ọ buru phe be o goshiru ọdu-biribiri iya; ephe l'iya nọdu l'ogbandzu, ukwe-iphe tso. O goshi phe g'a-abajeru iya aja. ⁵ Ephe bụ awa ndiche anyi phe; teme Kéreshi l'onwiya buru eri phe; me a -bya l'abubu,

* 8:36 8:36 Guna Ebu 44:22.

o bu nemadzu. G'e tuje Chileke, kangokotaru iphemiphe epha jasụ le tuutuutuu le m̄imiimii. Nokwa g'o d̄u.

⁶ Sụ-a; ebe o bukwanu ke g'a sụ l'iphe ono, Chileke pfuru ono buwaa iphe-mmanu; kele o to bugbabekwa ndu shi le Izurelu bu okpobe ndu Izurelu. ⁷ Ophu g'ephe ha abuebedu okpobe unwu Ebirhamu opfu l'ephe bu awa iya. O kwa g'o duchia baa: "Oo ndu shi l'okpa Ayizaku be bu ndu a-buru unwu ngu kpurumu." ⁸ Iphe, iphe ono egoshi bu l'o to budu iphe, bu ndu a nwuru anwunwu mmanu be bu unwu Chileke. Oo ndu Chileke kweru Ebirhamu ukwe l'oo-nwuta bu ndu aagu eye l'okpobe unwu Ebirhamu. ⁹ Le ge Chileke gude kwe Ebirhamu ukwe-iphe ono bu l'o suru iya: "Egube nta apha ozo be mu a-bya agbaphee ngu; Sera anwuta nwa nwoke."

¹⁰ Ebe o buledaa ono kpurumu; unwu Ribeka tukokwa shi le nna lanu, bu Ayizaku, bu iya bu nna anyi ke ndiche. ¹¹ Mbuoro teke eteke anwudu unwegirima labo ono; ophu ephe eke emedu iphe, du ree; ozo iphe, du eji be o pfuru opfu ehu phe; k'ophu iphe, Chileke tuberu e-me; le k'ahota, o hotaru ndu nkiya, l'ebe abu l'ephe meru ree; ozo l'ephe meru eji. ¹² O buru iya meru g'o gude a sụ Ribeka: "Oo onye k'ogeranya e-mechaa ejeru onye ke nwata ozi." ¹³ Bu iya bu iphe, e deru sụ: "Jiekopu be mu yeru obu; Iso dukwanu mu ashị."

¹⁴ ?Denu g'anyi e-ye iya onu nta? ?Anyi a-su le Chileke te emeduru iphe, pfuru oto too? Tuswekwa! ¹⁵ Kele o suru Mosisu: "O-duru onye o du mu ge mu phuru obu-imemini; mu aphuru iya ya. Teke o duru onye o du mu ge mu doberu obu-oma; mu edoberu iya ya." ¹⁶ Oo ya bu l'o to budu uche nemadzu; ozo iphe, eeme l'eka; oo Chileke aphuje obu-imemini. ¹⁷ Kele ekwo-opfu Chileke

pfukwaru sụ ịe Chileke sụru Fero: “Iphe, mu gude mee ngu eze ta adụkwa iphe ọzo, ọ bụ; gbahaa gẹ mu egude ngu goshi g'ike mu ha; wafua gẹ ndiphe mgburugburu eshi nno maru onye mu bụ.” ¹⁸ Ọo ya bụ ịe Chileke bụ onye ọ dū iya g'ọ phuru obu-imemini bẹ ọ phuru iya; ọ nọdu akpọ-chije obu onye dū iya g'ọ kpọ-chia ya.

Ehu-eghu mę obu-imemini kę Chileke

¹⁹ Ịi-sukwa mu rọ: Ọ -buru l'ọ dū egube ono ?buhunu gunu meru g'o gude Chileke nọdu anọdujekwapho ata nemadzu uta? Chileke -gbẹ tubewaa l'ọo ọwa-a iphe, ya e-me; ?bụ onye sụru akposhi iphe, Chileke tuberu ịe ya e-me? ²⁰ Ọle gube nwa nemadzu ọphu a-sụ l'iphe, Chileke meru ta adudu ree; ?I bụ gunu? ?Iphe, a kpuru l'urwa, ọojije onye kpuru iya nū sū: “?Ọ nwuru inwagha bẹ o gude ị kpua mu g'ị kpuru mu-a?” ²¹ ?Tobudu ọ-kpū-ite maru g'oo-me urwa iya? Ọ -dū iya g'o gude uzi urwa lanū kpua ite labọ gẹ nanū buru ite, e meru ọna; ọphuu aburu ite, e meduru ọna; ?tọo kpudu iya?

²² ?Ii-sukwanu agha mę ọ -buru l'ọo Chileke eme egube ono? Ọ duru ndu Chileke meru gẹ ya gude goshi oke-ehu-eghu iya; waa g'ike iya beru. A makwaru-a ịe ndu ono gbawaru g'o gege egude oke-ehu-eghu iya mebyia phę; ọle ọotarū phę nshi shii. ²³ Ọ dukwanuru ndu ọphu Chileke gude eme gẹ ya goshi l'odu-biribiri iya te nwedū etu. Ndu k'ono bẹ ọ phuru obu-imemini, bụ iya bụ ndu ono, ọ tubehawaru ịe yele ephe a-gbaru l'odu-biribiri iya ono. ²⁴ Ọ buru anyibe ndu k'ono, o shi ịe ndu Jiu mę ndu abudu ndu Jiu kua ono bẹ ọ phuru obu-imemini ono. ²⁵ Ọ buru iphe ono bẹ o pfuru l'ekwo Hosiya sū:

“Ndu eshidu buru ndibe mu
bẹ mu e-mechaa kua
ndibe mu.

Ọha ono, mu eshidu yee obu
 ono bẹ mu e-mechaa
 kua ndu mu yeru obu.

²⁶ Tẹme ọ bụru l'echilabọ ẹka
 ono,
 e shi sụ phẹ l'ẹphe ta
 abụdu ndu kẹ Chileke
 bẹ aa-nọdu kua phẹ
 ụnwu Chileke;
 mbụ Chileke nọ ndzụ.*”

²⁷ Tẹme Azáya chikwaaphọ mkpu ẹhu ndu Ízurelu sụ:
 “Ụnwu Ízurelu -hакpọo mẹ obeta ẹphe je l'aha g'ẹja,
 kuru l'enyimu; ọ kwaphọ nwa ndu ọphu abadu ishi bẹ
 aa-dzọta. ²⁸ Noo kẹle Nnajiuphu e-mekọta iphemiphe,
 o pfuru ndiphe. Oo-mechachaa ya ẹgwegwa; mee ya
 rengurengu g'ọo-du.” ²⁹ Ọ dughukwaa g'iphe, Azáya
 pfuhawarurọ tẹme o mee sụ: “Ọ tọ bụ lẹ Chipfu, bụ
 Ọkalibe-Kakọta-Ike te ekwedu g'awa anyi bvẹebe mẹ
 anyi abvụ gẹ Sodomu; mbụ mẹ o mee anyi iphe, o meru
 Gómóra.”

Ụpfu, adu ndu Ízurelu l'ọkpa

³⁰ Nta-a ?bụ awe bẹ anyi a-subekwanu iya ishi? Ndu
 ono, abụdu ndu Jiu ono, eshidu kukebe ẹhu eme g'a gụa
 phẹ lẹ ndu pfuberekoto ono; buakwaa ndu pfuberekoto;
 kẹle ẹphe kwetarụ. ³¹ Obenu lẹ ndu Ízurelu, bụ ndu
 kukeberu ẹhu eme g'a gụa phẹ lẹ ndu pfuberekoto ono;
 ta adukwa ike bụru ndu pfuberekoto. ³² ?Ọ bụru gụnu
 kparụ iya? Ọo kẹle ẹphe te egudedu ekweta chọo ya;
 ọ gbẹ bụru iphe, ẹphe gude ike k'ẹka phẹ meta; opfu
 l'ẹphe eme iphe, ekemu pfuru bẹ ẹphe gude chọo ya.

* 9:26 9:26 Gụnaa Hos 1:10.

Ɛphe jenụ evukota oke mkpuma ono daa iko. ³³ Ọ bụru iya bụ iphe, e deru sụ:

“Unu hụmakpodapho!

Mu woakwaru

mkpuma,

a-nọdu adu ndiphe ụpfu

togbo le Zayonu;

mbụ mkpuma ẹphe

e-vukota daa iko.

Ọphu onye kweru nkiya

abyadu akwa izimanu.†”

10

¹ Ụnwunna mu; iphe, dukpoo mu ree l'obu; teme ọ bụru iphe, mu anọduje epfu anụ Chileke g'o meeru iya ndu Ízurẹlu bụ g'o mee g'a dzọo phẹ. ² L'ọphu mu makpọoru bụ l'ọphu phẹ aphụphu l'ẹhu emeje uche Chileke; ọle ẹphe te egudedu mmamiphe eme iya. ³ L'eshinu ẹphe amadu k'apfubekoto ọphu shi Chileke l'eka; ẹphe gbẹ achọ apfubekoto k'eka phẹ; bẹ ẹphe shi nno jịka eworu onwophẹ dẹ l'apfubekoto kẹ Chileke. ⁴ Le Kéreshi meakwaru g'ekemu ta abụhe ụzo, Chileke shi agụ nemadzu l'onye pfuberekoto; g'iphe, bukpuo onye kweru kẹ Kéreshi bụru onye Chileke a-gụ l'onye pfuberekoto.

Ndzota bụ kẹ ndu kẹ Kéreshi

⁵ Wakwa gẹ Mosisu deru k'apfubekoto ọphu shi l'ekemu baa: “Onye eme iphemiphe ono bukwa iya bẹ oo-gude nọdu ndzụ.” ⁶ Obenu l'ọ waa iphe, e deru le k'apfubekoto ọphu shi l'ekweta baa: “Ta adukwa teke iije arị sụ: ?Bụ onye a-du ike laa l'imigwe.” Mbụ je ekuzeta Kéreshi. ⁷ Ọzoo; “?Bụ onye l'e-nyiba l'alị-maa?” Mbụ

† 9:33 9:33 Gụnaa Azá 28:16.

je ekufuta Kéreshi. ⁸ ?Bụ gūnu bẹ eepfukwanu? “Opfu Chileke nọakwa ngu ntse. Ọ kwa iya bụ opfu, ịikpu l'ọnu; bya aburu iya bụ iphe, nọ ngu l'egomunggo.” Ọo ya bẹ bụ ozi-oma ono, anyi ezi onoya, bụ iya bụ opfu k'ekweta-a. ⁹ Teke ọ bụ l'i gude ọnu ngu pfua ya hoo haa l'ọo Jizọsu bụ Nnajiuphu ọbu; bya egude ọkpoma ngu g'ọ ha kweta lẹ Chileke meru iya; o shi l'ọnwu teta dzuru ndzu; l'a dzoo ngu. ¹⁰ Onye gude obu iya g'ọ ha kweta; Chileke agwa ya l'onye pfulberekoto; ọ buru ọnu bẹ eegudeje pfua kẹ Kéreshi hoo haa; l'adzọ onye ọbu. ¹¹ L'e dekwaru l'ekwo-opfu Chileke sụ: “Onyemonye, woru onwiya ye iya l'eka bẹ iphere tee mekwa.” ¹² Ọ tọ dọekwa mkpocha, dū nū. L'onye phọ bụ onye Jiu; onye ọphuu buru onye Gurisu ta adọekwa; kẹle ọ bụhukwapho Nnajiuphu lanu ono bụ Nnajiuphu phẹ g'ephe ha. Ọ nọdu emeru iphe, bukpuo ndu epfuje anu iya nu eze-iphe-oma, paru eka apaa. ¹³ Kẹle “ọ kwa iphe, bukpuo onye l'eku epha Nnajiuphu bẹ aa-dzota.”

¹⁴ ?Denu g'ephe e-shikwanu eku epha iya m'ephe ekwetaduru nkiya? Teme ?denu g'ephe e-shi kweta k'onye ephe teke anumaswee nkiya? ?Denukwanu g'ephe e-shi numa iphe, adudu onye pfuru phẹ iya nu? ¹⁵ ? Denukwanu gẹ ndu-ozima e-shi je ezi ozi-oma; l'ebe abu l'e ziru phẹ g'ephe je? Ọ buru iya bụ iphe, e deru sụ: “Lenu iphe, ọkpa phẹ ama; mbu ọkpa ndu ezi ozi-oma kẹ nchi adu doo; teme ephe nọdu ezi iphe, du ree.” ¹⁶ Ọle ọ tọ bụebedu g'ephe ha bẹ meru iphe, ozi-oma ono pfuru. Kẹle Azaya pfukwaru sụ: “Nnajiuphu ?buhunu onye bẹ kweru kweta iphe, ọ numaru anyi l'ọnu?” ¹⁷ Ọo ya bụ l'ekweta shi l'anuma iphe. Iphe, aanuma bukwanuru Opfu Chileke.

¹⁸ Ọle gẹ mu jeshikwa: ?Bụ anuma bẹ ephe ta anumaduru ozi-oma ọbu tọo? Waawakwa! Ephe

nụmachacharu iya-a!
 “A nũa-dzukwaru olu phẹ
 l'ẹkameka l'eliphe.
 Mbụ l'opfu phẹ ngakọtaru
 eliphe jasụ
 l'ẹka igwe beru;
 alị beru.*”

19 Mu byakwa ajị sụ: ?Bụ ẹnya bẹ ozi-oma ono eshidu doo ndu Ízurẹlu tọo? Lẹ Mósísu vuhaakwaru ụzo yee ya ọnu sụ:

“Mu e-gude ọha, abụdu
 ọkpobe ọha
 meru okophoo ye unu l'ẹhu.

Mu e-gude ọha, eme eswe
 kpatsu unu ẹhu-eghu.†”

20 Teme Azáya kabakwaa ya rọ epfushi ike sụ:

“Ọ kwa ndu te eshidu achọ
 mu nụ bẹ hụmaru mu
 nụ.

Ọ bụru ndu te eshidu ajị ajị
 mu bẹ mu goshiru
 onwomu.‡”

21 Ọ byakwanụ l'ẹhu ndu Ízurẹlu; ọ sụ: “Ọ tọ dudu teke mu ta amachijedu ẹka gẹ mu heta ndu ono, bụ ndu kwefuru mu ike ono; mbụ ndu ẹjo-ọkpoma ono; g'ẹphe dakọbe lwaphuta azụ lwaphuta mu.§”

11

Obu-imemini, Chileke aphụru ndu Ízurẹlu

* 10:18 10:18 Gụnaa Ebvụ 19:4. † 10:19 10:19 Gụnaa Dit 32:21.

‡ 10:20 10:20 Gụnaa Azá 65:1. § 10:21 10:21 Gụnaa Azá 65:2.

¹ Mu byakwa ajĩa ọzo sụ: ?Bụ ajĩa bẹ Chileke jikawaru ndu nkiya tọo? Tụswekwa! Mbẹdua l'onwomu bukwa-a onye Ízurẹlu. Mu bụ oshilokpa Ébirihamu; bya aburu onye Okpa-ipfu Benjiaminu. ² Chileke ta ajikakwaru ndu nkiya, bụ ndu o vuru ụzo mahawaru. ?Unu ta amadu iphe, ekwo-opfu Chileke pfuru; mbụ gẹ Elayijia gude chia Chileke ichi ndu Ízurẹlu sụ: ³ “Nnajiuphu; ephe tukoakwaru ndu mpfuchiru nkengu gbuẹbe; bya enwukpọshia ọru-ngweja ngu. Ọ bụwaru mbẹdua phoduru kpoloko; ephe nọdu emekwapho g'ephe gbua mu.” ⁴ Ọle, ?Bụkwanu gụnu bẹ Chileke pfuru iya? Ọ sụru iya: “Mu dobekwaru iphe, ha g'unu nemadzu iri l'ẹsaa l'umadzu ukporo iri, bụ ndu teke ewosweeru ikpere gbuaru Balu l'alị.” ⁵ Nokwapho g'ọ du nta. Ọ dukwaru-a nwa ndu Chileke gudeepho k'eze-iphe-oma, oome haru họtta. ⁶ Teke ọ bukwanu l'ọo eze-iphe-oma bẹ e gude họtta phẹ; ọ n'iya-a bụ l'ọ tọ buedu iphe, e setaru l'akanya; odumeka bẹ eze-iphe-oma ta abụekwa eze-iphe-oma. Teke ọ bukwanu l'ọo iphe, e setaru l'akanya; ọ n'iya-a bụ l'ọ tọ buedu eze-iphe-oma; odumeka bẹ akanya ta abụekwa akanya.

⁷ Sụ-a; ?bụ awe bẹ anyi a-sube opfu obu ishi nta-a? Ọ tọ bubekwa ndu Ízurẹlu l'ophu nataru iphe, ephe riru aphu iya; ọ kwa ndu a hotaru nataru iya. Ndu ophuu bukotaruru ndu a kpọ-chiru okpoma. ⁸ Ọ bụru iya bụ iphe, e deru l'ekwo-opfu Chileke sụ: “Chileke nuakwaru phẹ maa meru mgbenya nọdu erwe phẹ. Ephe te egudeedu enya aphu ụzo; ophu ephe anumajeedu iphe lẹ nchi byasụ ntanụ-a.” ⁹ Teme Dévidi pfukwaapho sụ:

“Gẹ nri, ephe eri eriri
 bukwaru phẹ
 ọnyà-enu
 yele ọnyà-anụ,

ẹphe a-nmalahụ.

L'ọ bụru ụpfu dị phẹ l'ọkpa;
g'e gude iya gwata phẹ
ụgwo iphe, ẹphe meru.

¹⁰ G'ẹnya gbahụkwa phẹ ọchii
g'ọ tọ dị iphe,
ẹphe a-hụma.

G'apfụ hụfukwa phẹ bụkilii
jasụ l'ojeje.”

¹¹ Mu byakwa ajia ọzo sụ: ?ọkpa kabẹ tsua ndu Ízurẹlu ntsụ k'ọphu ẹphe darwuwaru alị; ẹbe ẹphe agbalihubaedu tọo? Tụswekwa! Ọchikwa l'ọkpa, tsuru phẹ ntsụ ono meru g'o gude ndzọta rwube ndu ọhozo; g'eeshikwanụ ẹgube ono gẹ ndu Ízurẹlu awata phẹ ekoru okophoo. ¹² L'eshinu ọ bụ emeswe, ndu Jiu mesweru meru g'o gude urwu kwata gbaaru ndiphe mgburugburu. Uburu, butaru ndu Jiu mekwaaphọ g'urwu kwata gbaaru ndu abụdu ndu Jiu. Mbụ l'urwu akwatakwa kabaanụ shii ọkpobe akaka mẹ ndu Ízurẹlu g'ẹphe ha lwaphuta azụ lwapfuta Chileke.

Ndzọta kẹ ndu abụdu ndu Jiu

¹³ Nta-a bụkwa unubẹ ndu abụdu ndu Jiu bẹ mu epfu eyeru. Sụ-a; eshinu mu bụ onye-ishi-ozii kẹ ndu abụdu ndu Jiu; bẹ mu gudekwa ozi ono eku onwomu. ¹⁴ K'ọphu bụ; g'ọ dụhabe; mu egudeje iya eme gẹ ndu alị mu ono awataru unu ekoru okophoo; gẹ mu eshi nno haru phẹ dzọo. ¹⁵ L'ọ -bụru teke ẹphe jikaru Chileke bẹ Chileke gbẹ mee gẹ yẹle ndiphe bya adu lẹ ree; ?bụ gụnu e-mekwanụ mẹ Chileke nataẹ phẹ phọ ọzo? Ndu nwuhuru anwuhu a-gbeshikwa dzuru ndzụ ọzo.

¹⁶ L'ò -bùru lẹ mebyi-iphe-mbù ono dù nsò; bẹ mkpukorophu iya dükotanaa nsò. Ọ -bùru l'ògbarabvu-oshi dù nsò bẹ ẹkali iya l'ophu dükotaakwapho nsò.

¹⁷ Sù-a; ndu Jiu dù g'oshi olivu unuphu, a harù ẹkali iya kwashia. Unubẹdua, abudu ndu Jiu bùru ẹkali-oshi olivu ẹgu, e wotaru bya edepfube l'ẹka a kwafuru ẹkali k'unuphu phò. E depfube iya; ọ dzuru ndzu. Nta-a bẹ unu shiwa l'ògbarabvu olivu unuphu phò amítaje mini gude nòdu ndzu. ¹⁸ Ọo ya bù lẹ-a; te ejekwa asù l'ò tọ dùdu iphe, ẹkali iya ọphu a kwashiru phò bù. ?Bù kẹ gùnu bẹ ii-gude eku onwongu? Nyatakwa l'ò tọ bùdu ngu gudeshi ọgbarabvu-oshi ono; l'ò chia ọgbarabvu-oshi ono gudeshi ngu.

¹⁹ Ii-gbenu sù: “A kwafuakwaru ẹkali-oshi ono; g'e depfube mbẹdua.” ²⁰ Ọle makwarù l'iphe, kparù iphe, e gude kwashia ya bukwa l'o to woduru onwiya ye Kéreshi l'ẹka. Gubedua nyikatakwanu pfuru pfushia ike; kẹle i kwetarù. Ọo ya bù lẹ-a; te etsenupho etsetse; gẹ ndzu gujekwa ngu. ²¹ Eshinu Chileke ahaduru ọkpobe ẹkali-oshi ono kẹ mmanù; ?bù-chia gubedua bẹ ọo-ha kẹ mmanù? ²² Nowarọ g'ii-gude hùma lẹ Chileke emeje odoo; hùmakwapho l'oomeje nemadzu iphe kpangangaa. O meru ndu jikaru iya nù iphe kpangangaa. O mekwanaaru gubedua odoo; mbukwa mẹ ọ -bùru l'i kweru nopyabe l'odoo obu, oomeru ngu; ọdumeka bẹ ọ kwafujekwa ngu phò. ²³ Teke ọ bù lẹ ndu kẹ Jiu jika-buhuru eze-iphe-oma kẹ Chileke bẹ Chileke ewolekwaru phẹ-a dophu azù l'ẹka ẹphe shi nòdu; kẹle Chileke a-dükwaa ike dophu phẹ azù l'ẹka ẹphe shi nòdu. ²⁴ Ọo ya bù lẹ-a; ọ -bùru l'a kwafuru ngu l'oshi olivu-ẹgu ono; bya eworu ngu depfube l'oshi olivu-unuphu phò; mbù ọ bùru iphe, e meru g'e te emejedu iphe; ndu ọwa-a, bukwanu phẹ bù ẹkali-oshi olivu-

unuphu ono g̃edegede b̃e ọo-kabakwanu Chileke nphe eworu ẹkali iya, o shi kwafu akwafu pho woru depfube l'oshi, ẹkali iya ono shi n̄du.

Obu-imemini Chileke l'ẹhu onyemonye

²⁵ Unwunna mu; o nweru ọkpobe-opfu, e domiru edomi, mu eme g'unu maru; g'unu ete ejejedu arị l'unu manukawaru iphe. Iphe, unu a-maru bu ẹ-a; ọ tọ bukwa g̃e ndu Ízurẹlu bu ẹjo-ọkpoma nta-a bu g'ẹphe a-d̄waro jeaduru. Teke ẹjo-ọkpoma ph̃e ono a-n̄o-beru bukwa teke ndu abudu ndu Jiu, Chileke h̄otarū l'a-tukowa lwaphutawa azu byapfuta iya. ²⁶ Ọo ya bu; teke ono; aa-tuko iphe, bu Ízurẹlu mgburugburu dzoo, bu iya bu iphe, e deru l'ekwo-opfu Chileke su:

“Onye-Ndzota e-shi ẹ Zayonu
bya.

Ọo-tuko ẹjo ememe,
unwu Jiékọpu
shi eme wofukota ph̃e
l'ẹhu.

²⁷ ‘K̄e ọwa-a bukwa ọgbandzu,
e-shi mu l'eka laaru
ph̃e teke ono,
mu a-gukotaru ph̃e nvu
l'iphe-ẹji,
ẹphe mekotaru ono.*, ”

²⁸ A -bya ẹ k'ozi-oma ono b̃e ọ gbekwa buru iphe kweru unu l'ẹphe bu ọhogu Chileke. Obenu l'a -bya ẹ k'ahota, Chileke h̄otarū ndu Jiu b̃e ẹphe bukwanu ndu Chileke yeru obu l'opfu ẹhu ndiche anyi ph̃e. ²⁹ Ẹ Chileke ta agbanwejekwa iphe, ọ rihawaru k'ememe l'ẹhu ndu ọ h̄otarū g'ẹphe buru ndu nkiya. ³⁰ L'unub̃e ndu abudu

* 11:27 11:27 Gūnaa Azá 27:9.

ndu Jiu shi b̄uru ndu te kwejedu eme iphe, Chileke pfuru; obenu l̄e nta-a b̄e Chileke ph̄uru unu obu-imemini opfu l̄e ndu Jiu te ekwejedu eme iphe, o pfuru. ³¹ Nokwaph̄o g'ò d̄u ndu Jiu b̄u ono. Nta-a b̄e ephe te ekwekwaph̄o eme iphe, Chileke pfuru g'ee-shi ḡe Chileke aph̄uru ph̄e obu-imemini g'ò ph̄uru unu. ³² Ọo ya b̄u l̄e Chileke har̄u onyemonye ụz̄o g'ephe te ekweshi eme iphe, o pfuru ḡe ya a-ph̄uru onyemonye obu-imemini.

Ọdu-biribiri Chileke

³³ Ha-oo! nkwaṁnya ȳle mmamiphe k̄e Chileke pakwar̄u omilomi. Ikpe, ookpeje ta ad̄ukwa onye s̄uru iya amaḗberu; ebe ọ d̄ukwa onye s̄uru amak̄otar̄u g'o meje iphe iya. ³⁴ “?B̄u onye maru uche Nnajiuphu? ?B̄u onye egoshije iya iphe, ọo-n̄duje eme? ³⁵ ?B̄u onye n̄j̄eru iya iphe; k'òph̄u ọo-s̄u g'ò pf̄ukwaa ya ụgwo iphe iya?” ³⁶ Ọo ya meru iphemiphe. Ọ b̄uru iya b̄e iphemiphe shi l'ẹka iya d̄u; ọ b̄ukwaru iya ph̄o b̄e iphemiphe, d̄u d̄u-doru. G'ajaja b̄uru k̄e Chileke jas̄u l̄e tuutuutu l̄e m̄imiimii. Nokwa g'ò d̄u.

12

Adz̄uru ndz̄u je ozi Chileke

¹ Ọo ya b̄u; ụnwunna mu; eshinu Chileke aph̄uru anyi obu-imemini nno b̄e mu arw̄o unu s̄u g'unu woru onwunu n̄u Chileke ọkpobe an̄unu; unu b̄uru iphe, dz̄u ndz̄u, unu gude gweeru Chileke ngweja, d̄u ns̄o bya ab̄uru ọph̄u Chileke natar̄u. Noo iphe, b̄u ọkpobe abar̄u Chileke ẹja b̄u onoya, b̄u iphe, gbar̄u iya n̄u. ² Unu te ekwekwa eme g'ụnwu-eliphe an̄duje eme. Iphe, unu e-mechia b̄u g'unu haar̄u Chileke onwunu g'ò b̄uru iya l'a-n̄duje agbanwe obu unu; g'uche unu b̄uru iphe ọph̄úú g'unu a-d̄uje ike maru iphe, b̄u uche

Chileke, bụ iya bụ iphe, dū iya ree; b̄uru iphe, ọ natarū bya ab̄uru iphe, d̄ube ree.

³ Iphe, mu gude epfuru unu iphe-a, mu abya epfufu-a b̄ukwa l̄ Chileke mewaru mu eze-iphe-oma; mu n̄odu epfuru iya unu g'unu ha sū g'unu ta arijekwaru onwunu g'unu ahadū. Ọ chia iphe, unu e-meje b̄ g'unu deje ̄nya l̄ mini maru iphe, unu ar̄i. Chileke h̄waru onyemonye oke iphe-oma, shi l'ekwekwe, onye kweru nkiya. Noo iphe, e-goshije onyemonye iphe, ọo-n̄odu ar̄iru onwiya b̄ ono. ⁴ L'ọ kwa g'ọ dū l'̄hu nemadzū b̄ ono; l'ogw̄ehu lanū enwejekwaru mp̄fukashi, dū igwerigwe; mb̄u ̄phe n̄odu at̄koje emegbaa iphe, dū iche iche. ⁵ Nokwaph̄ g'anyi dū igwerigwe; ọle anyi shi waa l'at̄gba, anyi l̄ K̄reshi t̄gbaru b̄uru ogw̄ehu lanū. Onyen̄onu l'oome ḡe ȳle nwibe iya dogba ̄hu. ⁶ Anyi nwegbaarū iphe-oma, Chileke meru n̄u anyi l'̄hu l'̄hu; onye g'eze-iphe-oma nkiya ha. Nta-a b̄ g'anyi gudeje iya mee iphe, g'ọ gbaru. Ọ b̄uru mp̄fuchiru, g'onye ono pfujekwa iya g'o goshiru iya ya l'ekwekwe, o kweru. ⁷ Teke ọ b̄ onye Chileke meru iphe-oma k'eje ozi; g'onye ọbu yeru ̄hu l'eje ozi. Teke ọ b̄ ezi iphe; g'onye ọbu zijekwa iphe. ⁸ Teke ọ b̄ adū obu; g'onye ọbu n̄oduekwapho l'adū nemadzū obu. Teke ọ b̄ l'anū iphe; g'onye ono sajekwa ̄ka asasa n̄u iya. G'onye n̄o l'ishi kukebejekwa ̄hu jeshi ozi ike; g'onye aph̄u obu-imemini ph̄ujekwa iya l'̄hu-utso.

N-yemobu

⁹ Ḡe n-yemobu i yeru nemadzū ta ab̄ukwaru l'̄eregede. Kpaj̄eru iphe-̄ji l'aphara; gudeshia ̄ka l'eme iphe, dū ree. ¹⁰ G'onyen̄onu yeje nwibe iya obu mebyi eyeye gude goshi l'unu t̄koru b̄uru ̄nwunna lanū. G'onyen̄onu kaj̄ekwa akwab̄e nwibe iya ̄bv̄u eme

l'onwiya. ¹¹ Jeshijekwa ozi ike; te emejekwa ẹnyiru. Hakwaa gẹ Unme-dụ-Nsọ meje ngu ire l'ẹhu; shi ẹgube ono mee g'ẹjeru Nnajiuphu ozi e-vuje ngu evuvu l'obu. ¹² G'iphe ono, unu ele ẹnya iya ono meje g'ẹhu tsọ unu ụtso. Unu atakwaphọ nshi mẹ unu -nọdu eje iphe-ẹhuka. Unu epfu anụ Chileke mkpụrumkpuru. ¹³ Unu yejeru nwibe unu, unu l'ẹphe tukuru bụru ndu kẹ Chileke ẹka lẹ mkpa, duru phẹ nụ. Unu ekukebeje ẹhu kwaa ẹbyaa, byaru unu.

¹⁴ Unu gọjeru ọnu-ọma nụ ndu eme unu mkpawere. Mbụ-a unu gọjekwa ọnu-ọma; unu ta atụjekwa nemadzụ ọnu. ¹⁵ Ndu ọzo -nọdu ete ẹswa; unu tsojekwaru phẹ tee ẹswa; ndu ọzo -nọdu ara ẹkwa; unu tsokwaru phẹ raa ẹkwa. ¹⁶ G'uche unu lẹ nwibe unu bụjekwaru nanụ. Unu te edobejekwa onwunu g'unu ahadụ. Ọ chia iphe, unu e-meje bụ g'unu lẹ ndu ẹnya lwaru megbajẹ. Unu ta abụjekwaru nwọmaru-ọ-machata.

¹⁷ Unu te egudejekwa ẹjo-iphe pfula nemadzụ ụgwọ ẹjo-iphe, o meru unu; gbahaa g'unu kukebeje ẹhu meje iphe, onyemonye a-maru l'ọo iphe, dū ree. ¹⁸ Unu kukebe ẹhu seje g'unu l'onyemonye nọdu lẹ nchị-odoo; l'iphemiphe, unu eme; mẹ oo-je l'ekwe ememe. ¹⁹ Ndu mu yeru obu; unu te emelatajẹkwa ụgwọ iphe, e meru unu. Unu hajekwa gẹ Chileke gude oke-ẹhu-eghu iya melata onye ono. L'e dekwaru l'ẹkwo-opfu Chileke sụ: “Emelata bụkwa mu bẹ ọ duru; ọ bụru mu l'a-pfula ụgwọ.” Noo iphe, Nnajiuphu eepfu. ²⁰ Ọ chia iphe ii-meje bụ: “Ọ -bụru l'onye opfu ngu bẹ ẹgu agụ; nụ iya nri. Teke ẹgu mini agụ iya; kee ya mini g'ọ ngua; lẹ ị -nọdu eme nno bẹ ị kpọberu iya icheku-ọku l'ishi.” ²¹ Te ekwejekwa g'ẹjo-iphe mekpee ngu; gudejechia iphe-ọma mekpeje ẹjo-iphe.

13

Akwabẹ ndu-ishi ùbvù

¹ G'onnyemonye mejekwa iphe, ndu-ishi phẹ sùru g'e meje. L'ò tọ dükwa onye byaru aburu ishi mẹ ọ -bùdu l'o shi l'ẹka Chileke; tẹme ọ bụru Chileke bẹ yeru ndu ọphu bụ iya nù nta-a. ² L'onye jikaru eme iphe, ndu-ishi pfuru bükwa ndu-ishi, Chileke yeru bẹ onye ono jikaru. Ndu ajikakwanu phẹ nù bụru ikpe bẹ ẹphe esekọ ekpu onwophẹ l'ishi. ³ Lẹ ndu eme iphe, dū ree ta atsujekwa ndu-ishi ebvu. Ndu atsū ndu-ishi ebvu bükwa ndu eme ẹjo-iphe. Teke ọ bụ l'ọ dū ngu g'i b'atsujeshi ndu-ishi ebvu; ọ n'iya bụ g'i meje iphe, dū ree g'onye-ishi ajaa ngu ajaja. ⁴ Kẹle onye-ishi ono bükwa onye-ozì Chileke; iphe, oome bụru iphe, a-dūru ngu lẹ ree. Ọle teke i mekwanuru iphe, adudu ree; tsukwaa ya ebvu; kẹle e te eyekwaru iya kẹ mmanu. Ọ bụ onye-ozì Chileke; bụru onye ahù ndu eme ẹjo-iphe ahùhù gude egoshi oke-ẹhu-eghu kẹ Chileke. ⁵ Noo g'o gude unu je l'emeje iphe, ndu-ishi pfuru; ọ tọ buledaa g'unu agbalaaru oke-ẹhu-eghu Chileke; obenu l'ọ bụfukwaapho g'unu meje iphe, obu ta anmadu unu ikpe.

⁶ Nokwaphọ iphe, meru g'o gude unu je apfuje akirikò. Noo kẹle ndu-ishi ono bụ Chileke bẹ ẹphe ejeru ozi; ẹphe nọdu anọduje eme g'ẹphe jee ya g'ọ gbaru. ⁷ Unu mejeru phẹ iphe, rwuberu phẹ nù. Onye o rwuberu l'aturu akirikò nù; unu aturu iya nù iya; onye o rwuberu l'aturu utu nù; unu aturu utu nù iya; onye ọ gbaru l'eyeru nsọ; unu eyejeru iya nsọ; onye ọ gbaru l'akwabẹ ùbvù; unu akwabẹ iya ùbvù. Unu mejeru onnyemonye iphe, rwuberu iya nù.

Eye nemadzū ibe ngu obu

⁸ G'ò tò òkwa ùgwò, unu e-jijeru nemadzù; gba-haa ùgwò n-yemobu. Kẹle onye yeru nwibe iya obu mekòtaakwaru iphe, ekemu sùru g'e meje. ⁹ Kẹle iphe, bukpoò ekemu-a g'ò hakòtakpoo, bu iya bu; te erikwa ogori; ophu i gbukwa ochi; ophu i zikwa iphuru; ophu iphe, onye ozo agujekwa ngu; mewaro unwu ekemu ozo, yigbaa ya nu. Ekemu ono g'ò hakòtakpoo jeru asube ishi le: "Yee nemadzù ibe ngu obu g'i yeru onwongu." ¹⁰ Onye yeru nemadzù ibiya obu te emejekwa iya ejo-iphe. Noo g'ò gude n-yemobu buru emeèbe iphe, ekemu pfuru.

Akwakòbe k'abyabya Kéreshi

¹¹ Sù-a; iphe mefuru g'ò gude unu je atukoje iphemiphe ono eme bu ge nta-a gbaru; mbu l'o rwuwaru teke unu e-shi le mgbenya tehu. Noo kẹle nta be ndzota anyi kawaa ntse eme le g'ò shi du-be enya me a -gbe le teke anyi beberu kweta ke Kéreshi. ¹² O dukwaa enya abali keru ebo; nchi abo hu dukwaa ntse. Oo ya bu; unu g'anyi gwobenu iphe, eeme l'ochii; kwaa onwanyi ngwogu ophu anyi e-gude alwu ugu l'iphoro. ¹³ G'anyi meje okpobe umere, eme l'iphoro; anyi ahaa eme ke nwanyi ozoo ke nwoke; haa angunuka mee. Anyi ahakwaapho emephe opfu; haa iji-enya. ¹⁴ O chia iphe, unu e-meje bu g'unu tukokpoephe umere Nnajiuphu, bu Jizosu Kéreshi meje g'oha. Unu ta ahakwaru obu egube nemadzù, unu shi buru uzo; mbu k'ophu unu e-mejeephe ejo-iphe agu iya nu.

14

Anma nemadzù ikpe l'egomunggo

¹ Onye ekwekwe iya du nyegenyege; unu hajekwa iya g'unu l'iya nodu. O l'oo g'unu l'iya te ejejekwa atu ego l'iphe, o sùru l'oo owa-a g'ò du iya bu owa. ² O duru

ndu adudu iphe, ephe aso nsɔ eriri; o bekwanu l'onye ophuu, ekwekwe iya dukwadu nyegenyege pho buepho iphe, oorije bu eba-ophe. ³ Oo ya bu; g'onye ono, ta adudu iphe, ooso nsɔ pho ta akpokwanu onye ophuu ebo l'afu l'o to ridu ge ya eri. Noo kele Chileke nataakwarupho yebedua. ⁴ ?I bu gunu? ke g'o buru onye ejeru onye ozo ozi be ii-nodu agbarwushi. Oo Nnajiuphu iya be a-nma iya ikpe l'oome eji; ozoo l'osuu l'oome ree. O bekwanu l'oo-nodu eme ree; kele Nnajiuphu suru g'ome iya g'o me ree.

⁵ O nweru onye a-hota eswe ujiku lanu dobe l'oo eswe ono kakota ndu ophuu mkpa; nweru onye a-ri su l'eswe ta adudu ophu ka nwibe iya mkpa. G'onyenonu pferupho l'ophu o pfuru pfushia ya ike. ⁶ Onye riru l'o nweru mboku ophu ka nwibe iya mkpa dobe iya iche; l'eme iya gude akwabep Nnajiuphu ubvu. Onye adudu mboku, duru iya le nsɔ bukwarupho Chileke be oomeru iya. Onye adudu iphe, ooso nsɔ eriri l'eri iya gude akwabep Nnajiuphu ubvu. Noo kele ookeleje Chileke ekele iya. Onye aso iphemiphe nsɔ buru Nnajiuphu be osoru iphemiphe nsɔ; teme o nodu ekeleje Chileke ekele iya. ⁷ O to dukwa g'anyi ha; onye no ndzu no-doru onwiya; ophu o dukwa onye anwuhu anwuhu anwuhu-doru onwiya. ⁸ Anyi-dzuru ndzu; bu Nnajiuphu be anyi dzuru iya; teke anyi anwuhu anwuhu; o kwapho Nnajiuphu be anyi anwuhu alapfu. Oo ya bu l'anyi bu ke Nnajiuphu: me anyi no ndzu; me anyi anwuhu anwuhu. ⁹ Kele Kereshi nwuhuchaaaru bya adzuru ndzu ozo g'oo-buru Nnajiuphu ndu nwuhuru anwuhu; me ke ndu dzu ndzu. ¹⁰ Su-a; ?denu g'o gude i nodu agbarwushi nwanna ngu l'ime obu ngu? Ozoo; ?o meru imagha be o gude i nodu akpo iya ebo l'afu? ?Ti madu le g'anyi ha l'e-mechaa pfukotaru l'iphu Chileke; onye bu iya l'e-kpekota anyi

ikpe? ¹¹ Noo l'e deru l'ekwo-opfu Chileke sụ:

“ Eshinu mu dzụ ndzụ’;

bẹ onyemonye

e-mechakwaa gbuaru mu

ikpere l'alị.

Nokwa iphe, Chipfu eepfu.

Onyemonye e-mechaa

pfukọta l'ọo mu bụ

Chileke.*”

¹² Ọo ya bụ lẹ g'anyi ha l'onye l'onye l'e-emecha nọdu l'iphu Chileke; doo edo onwiya.

Akwatsu nwibe ngu

¹³ Ọo ya bụ; g'anyi ta anọdujeshinu agbarwushi nwibe anyi. Ọ chia g'anyi tuko tubua g'anyi ta abụjeru ụpfu dụ nwanna anyi l'okpa; ọzoo meta iphe, e-me g'o mee iphe-ẹji. ¹⁴ Eshinu mu lẹ Nnajiuphu, bụ Jizosụ tųgbaru bụru nanụ bẹ ọphu dokpọoru mu ẹnya ọkpobe edodo bụ l'ọ tọ dudu iphe, eeri eriri, mu asokwadu nsọ. Ọle teke ọ bụ l'o nweru onye pfuru sụ l'iphe, dụ ẹgube-a bẹ ya asọ nsọ; ọo ya bụ; iphe ono a-buru iphe, aasọ nsọ l'ẹhu onye ono kwa. ¹⁵ Teke ọ bụ l'i gude k'iphe, iiri l'ọnu mee nwanna ngu; k'ọphu ẹhu ebvuduru iya ebvuru; ọo ya bụ l'i ti mehẹdu iphe, egoshi l'i yeru iya obu. Ọo ya bụ; g'iphe, iiri l'ọnu ta akpatakwa gẹ nwanna ono, Kéreshi nwuhuchiru ọnwu ono laa l'iswi. ¹⁶ Te ekwekwa g'iphe, dụ ree, iime vuta ẹjo ẹpha. ¹⁷ L'iphe, bụ lẹ Chileke bụ eze ta abụkwa l'iphe, eeri l'ọnu; ọzoo l'iphe, aangụ angungu. Ọ kwa apfubekoto; yele nchị-adu-doo; waa ẹhu-utso ọphu shi l'ẹka Unme-dụ-Nsọ. ¹⁸ Onye ejeru Kéreshi ozi ẹgube ono eme iphe, jiru Chileke ẹpho; bya emekwaphọ iphe, dụ ndiphe ree.

* 14:11 14:11 Gụnaa Azá 45:23.

¹⁹ Ọo ya bụ; g'anyi túbepho nvo l'iphe ono, emeje gẹ nchị dū doo onoya; mbụ iphe ono, l'a-nọdu eme gẹ nwibe ngu pfushia ike l'ekwekwe, o kweru kẹ Chileke ono. ²⁰ Te egudekwa k'iphe, iiri l'ọnu mebyia iphe, Chileke eme. Iphemiphe, eeri eriri, dūbekwa ree. Ọle ọ tọ gbaduru gẹ nemadzū ria iphe, a-kpata gẹ nwibe iya mee ẹji. ²¹ Ọ kakwa ree g'ị tị tashị anụ; ọphu ị ngūshi mẹ; ọphu ọ dūkpoo iphe, ii-je ememe, bụ iphe, a-buru ọpfu dū nwanna ngu l'ọkpa mee ya g'ọ daa; ọzoo mee ya g'ọ dū nyegenyeye. ²² G'iphe, bụkpoo iphe, i kweru bụekwarupho iphe, dūru gū lẹ Chileke. Onye ẹhu atsọ uto bụkwa onye meru iphe, ọ riru l'ọ dū ree ememe; ẹbe ọ dudu teke obu anma iya ikpe l'iphe, o meru. ²³ Obenu l'onye abọ obu ẹbo bẹ ikpe nmakwaru mẹ o -ria iphe ọbu; kẹle ọ tọ nọdu Chileke l'ẹka eme iphe, oome. Kẹle iphemiphe, nemadzū eme; ẹbe ọ nọdu Chileke l'ẹka eme iya bụakwaa ya eme iphe-ẹji.

15

Etso ẹka Jizosu Kéreshi

¹ Anyịbe ndu shihuru ike; l'a-nọduje ata nshi l'iphe, ndu eshihuduru ike eme. G'anyi te emejeekwapho ẹhu anyi ẹhu anyi. ² Onyenọnu g'anyi ha meje iphe, a-tso nwibe iya uto; l'ọ buri iphe, ee-gude kutsee ya. Ọo ya bụ; g'obu akabakwanaa ya eshihu ike l'iphe, kẹ Chileke. ³ Lẹ Kéreshi ta abukwa ẹhu iya ẹhu iya bẹ o shi emeje. Iphe, meru nū bụepho iphe ono, e deru sū: “Iphe, bụkpoo ẹjo-opfu, ndu epfuru ngu ẹjo-opfu pfuru ngu bụ mbẹdua vutaru ọnwu iya.” ⁴ L'iphemiphe, e dekọtaru teke ndiche bẹ e dekwaru g'o zia anyi iphe. Ọduje anyi obu g'anyi aduje ike taa nshi nọdu ele ẹnya iphe, Chileke kweru anyi ukwe iya. ⁵ Gẹ Chileke ono, bụ iya emeje g'anyi tajẹru iphe nshi; bya aduje anyi obu ono mee

g'unu gude etso ẹka Kéréshi Jizọsu g'obu bụru unu nanu.
⁶ Ọo ya bụ; g'unu atuko g'unu ha tuga; gude obu lanu;
 gudekwapho olu lanu aja Chileke ajaja; mbu Chileke, bu
 iya bu Nna ke Nnajiuphu anyi, bu Jizọsu Kéréshi.

Ozi-oma bu ke ndiphe mgburugburu

⁷ Ọo ya bụ; unu gudeje obu unu haa g'unu le nwibe unu tuga; ge Kéréshi hakwarupho; unu l'iya tuga; noo ya bu g'aa-jakwanaa Chileke ajaja. ⁸ L'iphe, mu epfu bu le Kéréshi byaru bya aburu onye-ozu ndu buru ubvu; g'o mee g'iphe ono, Chileke kweru ndiche anyi phe ukwe iya pho vukota. Ọo ya bụ; g'oo-shi nno goshi le Chileke bu onye ire-lanu, emeje iphe, o pfuru. ⁹ Wafua ge ndu abudu ndu Jiu ajaa Chileke ajaja l'o phunukaru phe obu-imemini, bu iya bu iphe, e deru su: "Ọo ya meru g'o gude mu je l'etu ngu epha l'echilabo ndu abudu ndu Jiu. Mu e-gude epha ngu gua ebvu jaa ngu ajaja." ¹⁰ Teme e dekwaapho su: "Unube ndu abudu ndu Jiu; unu le ndu Chileke hotaru tuko tee eswa!" ¹¹ Ozo buru: "Unu tua Chileke epha; unube ndu abudu ndu Jiu g'unu ha. Ndiphe mgburugburu; unu tua ya epha!" ¹² Teme Azaya byakwapho bya epfua su: "Oshilokpa Jiesi l'a-bya! Ọo ya e-tsefuta bya aburu eze k'iphe, bu ndu bu ndu abudu ndu Jiu. O buru iya bu onye ephe a-nodu ele enya iya." ¹³ Ge Chileke, onye bu iya emeje g'anyi lee enya iphe, o kweru ukwe iya; mee g'ehu-utso unu dzua oke; l'oomekwaapho g'ehu dubebe unu guu g'unu ha; kele unu kweru nkiya. Ọo ya bụ; g'unu egude ike ke Unme-du-Nso kabakpoo ele enya iphe ono, Chileke kweru ukwe iya ono.

Iphe, kpataru Polu ede

ekwo-ozu-a egube-a

¹⁴ Unwunna mu; unubedua be mu maakwaru majia enya; l'iphe, unu maru buephho eme iphe, du ree; l'unu

maru iphe, bu uche Chileke okpobe amaru; k'ophu unu suru g'unu a-nodu akpo-ziru nwibe unu uzo. ¹⁵ Oe g'o duhabe; o nwekwarupho nwiphe, mu eme ge mu haru nyatacharu unu; o buru iya meru g'o gude mu haru pfua iphe ono pfushia ya ike; mbu ophu mu atsudu ebvu; ke Chileke mewaru mu eze-iphe-oma. ¹⁶ O mewaru mu; mu buru onye-ozu Kereshi Jizosu; ge mu je ezia ndu abudu ndu Jiu ozi; mu eje ozi, gbaru onye uke Chileke l'ezu ozi-oma ono, shi l'eka Chileke onoya. Oo ya bu ge Chileke anatakwanu ngweja ndu abudu ndu Jiu. L'o buru iphe, Unme-du-Nso e-me g'o buru iphe, e doberu Chileke iche. ¹⁷ Oo ya bu le mu a-nodu etukpo onwomu epha ozi, mu ejeru Chileke; eshinu mu le Kereshi tugbawaru buru nanu. ¹⁸ O to dukwa iphe, mu atu ama epfufu, abudu iphe ono, Kereshi gbem mu l'eka mee ono, bu iya bu l'o meru ge ndu abudu ndu Jiu kweta bya aburu ndu emeje iphe, Chileke pfuru. Iphe ono be Kereshi gude opfu onu mu; me iphe, mu eme ememe; mee o du egube ono. ¹⁹ O gudekwapho ike k'eme ohumalenya, dugbaa biribiri; me ike ke Unme-du-Nso gude mee ya. Oo ya bu; e shi egube ono mu nodu asaje ozi-oma ke Kereshi ono g'o gbaru l'ekameka; e -shi le Jierusalemu jasu mu rwua Ilirikumu. ²⁰ O buerupho iphe lanu, anoduje evu mu evuvu l'obu bu eje epfu opfu Chileke; ole o to bukwa ge mu je iya epfufu l'eka a mahawaru ke Kereshi; ge mu ta agbe gbeshi je akpuaaha uo l'eli okpa uo, onye ozo tuhawaru. ²¹ O dua g'iphe, e deru l'ekwo-opfu Chileke su:

“Ndu e teke pfusweeru nkiya
l'a-huma l'anya.

Ndu e teke anuma-swee nkiya be ke nkiya ono e-do
anya.”

Pọlu e-je g'ẹphe ẹ ndu Romu kwee

²² Oo iphe ono meru g'o gude o nweru iphe, kpọshichawaru mu ugbo olemole gẹ mu ta abya agbaphee unu. ²³ Obenu ẹ nta-a bẹ eshinu mu jeẹbewaru iphe, gbaru mu l'ejeje l'uswe iya ọwa; tẹme mu nọwaa apha olemole, mu shi meta gẹ mu e-me gẹ mu bya gẹ mu l'unu kwee; ²⁴ bẹ mu arikwa ẹ mu e-megha iya nta. Mu arị ẹ mu a-bata mẹ mu -jejeẹpho Supenu. Mu l'unu kpọchaa nwụpfu nwanshii g'obu shihu mu ike; unu eduwa mu rọ ije; gẹ mu jeshia ẹka ono. ²⁵ O -buru kẹ nta-a bukwa ndu kẹ Chileke nọ ẹ Jierúsalemu bẹ mu gude iphe ewojeru g'ẹphe mee ẹka atsụ phẹ l'ẹhu. ²⁶ Ẹ ndu kẹ Kéreshi ẹ Masedoniya; mẹ ndu kẹ Akaya bẹ chiru idzu; taa iphe g'a nū ndu-nsọ ẹ Jierúsalemu; ndu ọphu adudu g'ọ du phẹ. ²⁷ Ẹphe tųkpooru obu phẹ onyo nū iphe ono. Tẹme e -jejekpọo ya epfufu bẹ unu maru l'ọ dūwaa g'ugwo; ẹphe jiru iya ndu kẹ Chileke ẹ Jierúsalemu; ẹ teke ọ bụ ẹ ndu abudu ndu Jiu bẹ ẹphe ẹ ndu ọphu bụ ndu Jiu gba mgba l'iphe-oma, shi Unme-dū-Nsọ ono, Kéreshi meru nū ndu Jiu onoya l'ẹka; ọo ya bụ l'ọ gbaru g'ẹphe gudeje ẹku ọphu ẹphe kpatarụ gude yeru ndu Jiu ono ẹka. ²⁸ Teke mu jechaerupho ozi onoya; nuchae phẹ phọ okpoga ono, a tataru onoya l'ọo-buru mu eje Supenu; mu e-shiwarọ bata teke onoya. ²⁹ Ọphu mu maru bụ ẹ teke mu byaru bẹ mu e-me g'iphe-oma, shi Kéreshi l'ẹka dzua unu oke l'ẹka.

³⁰ Unwunna mu; mu arwo unu sū g'unu gude k'iswi ẹhu Nnajiuphu anyi, bụ Jizosu Kéreshi waa k'eye obu ọphu shi Unme-dū-Nsọ l'ẹka lwubude mu ọgu ono. Unu pfuje opfu ẹhu mu nū Chileke. ³¹ Gẹ Chileke te ekwekwa gẹ ndu jikaru ozi-oma ono l'alị Jiudiya fūaru mu l'uzo; yẹfua g'iphe, mu gude eje dukwapho ndu-nsọ ẹ Jierúsalemu ree anata. ³² Oo ya bụ; ọ -buru uche

Chileke; mu egude ẹhu-utso byapfuta unu g'anyi l'unu nọta; k'ọphu ọo-buwaruro mu l'unu atuta unme. ³³ Gẹ Chileke ono, emeje gẹ nchị dū doo ono swikwaru unu eswiru g'unu ha. Nokwa g'ọ dū.

16

Pọlu ekelegbaa ndu ọ maru l'ẹhu l'ẹhu

¹ Mu eme g'unu maru nwanna anyi nwanyi, bu Fibi; onye l'ejeru Chiochi, nọ le Kenkiriya ozi. ² Unu gude iswi ẹhu Nnajiuphu anyi nata iya ọkpobe anata g'ọ gbaru ndu-nsọ l'ememe; unu eyejeru iya ẹka l'iphe, bukpo iphe, mkpa iya duru iya l'echilabo unu; l'o yekpoakwaru ikpoto nemadzu ẹka; mekpoo mbedua l'ishi onwomu.

³ Unu keleru mu Pisisila yee Akwila; ndu anyi l'ephe tukoru ejeru Kereshi Jizosu ozi; ⁴ ndu gude iswi ẹhu mu loo ishi phe alo. Ọ to bulekwu mu-a l'ekele phe nwekinyi mu k'iphe, ephe meru mu. Iphe, bukotakpoo Chiochi, nọ l'alị ndu abudu ndu Jiu mgburugburu l'ekelekwu phe pho. ⁵ Nokwapho g'unu e-keleru mu Chiochi ono, edzukoje l'ibe phe ono.

Unu kelekwaru mu pho Epenitosu; ọkpobe onya mu, mu yeru obu. Ọo ya bu onye vuchakpo ọzo woru onwiyaya ye Kereshi l'eka le Eshiya. ⁶ Unu kelekwaru mu pho Meri; onye jeru anyi ozi jeshia ya ike. ⁷ Unu ekelekwapho Anduronikosu yee Jiuniyasu; ndu mu l'ephe bu ndu Jiu lanu bya aburu ndu mu l'ephe shi tukoro nodu mkporo. Ephe bu ndu kwatakporo duru onyemonye le nsọ me a -bya l'eka ndu-ishi-ozu nọ; teme ephe vuru mu ọzo buru ndu ke Kereshi.

⁸ Unu kelekwapho Ampuliyatosu; onye mu yeru obu l'ime Nnajiuphu. ⁹ Unu ekelekwapho Ubanosu; onye anyi l'iya tukoru ejeru Kereshi ozi; mekwapho onye ono, mu yeru obu ono, bu Sutakis. ¹⁰ Unu kelekwapho

Apelisu; onye gudewaa umere iya goshi le ya pfu-shiru ike l'ekwekwe, o kweru ke Kereshi. Unu ekelekwapho ndibe Arisutobulosu. ¹¹ Unu kelekwapho Herodiyonu onye mu l'iya tukoru buru abubu. Unu ekelekwapho ndu bu l'ibe Nasisosu; ndu nowaa Nnajiuphu l'eka.

¹² Unu kelekwapho Tirayifina yee Tirayifosa ndu ejeru Kereshi ozi ejeshikpo ya ike. Unu ekelekwapho onye mu yeru obu, bu Pesisu; onye jewaru Kereshi ozi jeshikwaa ya pho ike. ¹³ Unu kele Rufosu onye ono, gbaru iche l'ejeshi ozi ke Nnajiuphu ike ono. Unu ekele ne iya; onye duhukwapho g'o buwaa ne nkemu. ¹⁴ Unu kelekwaru mu pho Asinkiritosu; waa Fulegonu; waa Hemisu; waa Patur-obasu; waa Hemasu; mekpowaro unwunna ozo, ephe l'ephe tukoru ndu l'eka ono. ¹⁵ Unu kele Filologosu; waa Jiuliya; waa Niriyosu; waa nwune iya ke nwanyi; waa Olimpasu; mekpowaro iphe, bukotakpoo ndu-nsa, ephe l'ephe no l'eka ono.

¹⁶ Unu kelekwaa nwibe unu ekele; nmata phe akpa, du nsa. Ndu ke Kereshi, no l'iphe, bukota Chiochi l'ophu ekelekwotakwapho unu ekele.

Iphe, unu e-meje

¹⁷ Unwunna mu; mu arwoka unu arworwo su g'unu letakwa enya m'obvu ndu ono, anoduje eme g'ekwo du onoya; ndu egudeje egube ono agbaghashi iphe, Chiochi kwetaru l'o bu okpobe-opfu. Iphe, ephe anoduje eme be yee iphe ono, e ziru unu ono ta adagbajedu. Unu kpakwaru phe l'aphara. ¹⁸ Kele ndu eme udu iphe ono ta abukwa Nnajiuphu anyi, bu Kereshi be ephe ejeru ozi; o kwa iphe, ekpiri iya du phe be ephe eje ozi iya. Ephe eteje manu l'opfu; gude ire mecha mecha edepushi ndu enwezidu egomunggo. ¹⁹ Ole onyemonye tukoru maru g'unu emeberu iphe, ozi-oma ono pfuru. O buru iphe

ono meru g'o gude ẹhu nọdu anọduje atso mu uto. O ẹ du mu g'a su g'unu gudeje mmamiphe majeru iphe, bu iphe, du ree; sefuje ẹka l'iphe, adudu ree. ²⁰ Chileke onye bu iya be nchi-adu-doo shi l'eka taa nọekwa odu g'o to mee g'unu zopyashia Nsetanu l'okpa. Ge Nnajiuphu anyi, bu Jizosu Kereshi mekwaaru unu eze-iphe-oma.

²¹ Timoti, mu l'iya tukoru eje ozi-a; l'ekelekwapho unu. Lusiyosu; waa Jiasonu; me Sosipeta phe; ndu anyi l'ephe tukoru buru abubu l'ekelekwapho unu.

²² Mbẹdua, bu Teshiyosu, l'ede ekwo-ozia; bya aburu onye unu l'iya tugbaru nanu l'ime Nnajiuphu l'ekelekwapho unu ekele.

²³ Gayosu-a, mu bu l'ibe iya-a; teme o buru l'ibe iya be Chiochi l'ophu edzukoje-a; l'ekelekwapho unu-o! Nokwapho ge Erasutosu; mbu onye owa-a, bu iya edobejeru oha okpoga phe-a; l'ekelekwapho unu yee nwanna anyi, bu Kwotosu.

²⁴ Ge Nnajiuphu anyi, bu Jizosu Kereshi meeru unu g'unu hakota eze-iphe-oma. Nokwa g'o du.

Aja Chileke ajaja, Pọlu gude
kpọ-chia ozi ishi

²⁵ G'anyi jaa Chileke ajaja; l'oo ya l'a-du ike mee g'unu pfuru pfushia ike l'ekwekwe, unu kweru nkiya. O buru ozi-oma ono, mu ezi ono be oogudeje eme g'unu pfushia ike ono; mbu ozi-oma ono, l'epfu ke Jizosu Kereshi onoya; bya egoshikwapho iphe ono, e shi domia edomi ono, a phuru l'ophulenyia eshi l'edenwede ono. ²⁶ O buru iphe ono be o gbẹ nta-a bya emee g'a maru. Nta-a be okpobe-opfu ono shiwaa l'iphe, ndu mpfuchiru Chileke deru bahu g'ite; a numa-dzuru iya. Nta-a be Chileke ono adudu teke aa-su l'o shi; ophu o dudu teke aa-su l'o noo teke onono-beru ono; ziru e woru okpobe-opfu ono

mee; ọhamoha mgburugburu madzuru iya; k'ọphu ee-
kwetadzuru meje iphe, ọ sụru g'e mee. ²⁷ G'e shi Jizọsu
Kéreshi l'ẹka jaa Chileke ajaja; mbụ onye lanụ ono, bụ
yẹbedua nwẹkiya bụ Chileke; tẹme ọ bụru iya nwẹkinyi
iya nwe kẹ mmamiphe. G'a jaa ya jasụ ẹ tuutuutuu ẹ
mịimiimii. Nokwa g'ọ dụ.

Bayıburu Izii
Izii: Bayıburu Izii Bible

copyright © 2014 Wycliffe Bible Translators, Inc.

Language: (Izii)

Contributor: Wycliffe Bible Translators, Inc.

All rights reserved.

2020-11-18

PDF generated using Haiola and XeLaTeX on 30 Dec 2021 from source files dated 30 Dec 2021

c6885c7c-c550-5b8b-a4fe-4bd714af4f6d